

四庫全書

史部

欽定四庫全書

史部

浙江通志卷二百四十六

七

詳校官給事中臣戴璐

檢討臣德生覆勘

總校官編修臣倉聖脉
校對官主簿臣汪日贊

謄錄監生臣張炳

欽定四庫全書

浙江通志卷一百四十六

名宦

名棠卹雨具載風詩蓋遺愛在民歷久而不能忘
也兩浙仕宦後先相望而樹德建功光昭竹帛者
正復指不勝屈凜遵

聖諭矢公矢慎遠稽近考不敢有善而失載尤不敢無
美而濫登至前代有以浙人仕浙者其政績具見

人物門無庸複出志名宦

總轄

周

范蠡

史記越王句踐世家蠡事越王句踐苦身戮力與句踐深謀二十餘年滅吳報會稽之恥北渡兵於淮以臨齊晉號令中國以尊周室句踐以霸蠡稱上將軍還反國蠡以為大名之下難以久居

乃乘舟浮海以行

自號鴟夷子皮

謹按史記索隱注蠡字少伯楚宛三戶人舊浙江通志作吳人非是

計然

史記貨殖傳越王句踐困于會稽之上乃用計然計然曰知闕則修備時用則知物二者形則

萬貨之情可得而觀已平糶齊物闕市不乏治國之道也論具有餘不足則知貴賤貴上極則反賤賤下極則反貴貴出如糞土賤取如珠玉財幣欲其行如流水修之十年國富厚賂戰士赴矢石如渴得飲遂報強吳觀兵中國注徐廣曰計然葵邱濮上人姓辛氏字文子

秦

王翦

史記本傳平陽東鄉人少好兵事秦始皇乘勝畧定荆地城邑因南征百越之君始皇二十六

年盡并天下

王氏功為多

謹按秦始皇本紀二十五年翦遂定荆江南地降越君置會稽郡於浙有平定功當入名宦後灌嬰此倣

漢

灌嬰

漢書本傳睢陽販繒者也高祖為漢王嬰以御史大夫將車騎別追項籍渡江定吳會稽郡漢

王即帝位剖符食潁陰

二千五百戶諡懿侯

魏相

漢書本傳字弱翁濟陰定陶人舉賢良以對策高第為茂陵令遷揚州刺史考按郡國守相多

所貶退丙吉與相書曰朝廷已深知弱翁治行方且大用矣願少慎事自重藏器于身相心善其言

為齊威嚴居部二歲徵為諫大夫宣帝即位為丞相封高平侯

謹按漢之揚州刺史及東漢初之揚州牧皆統轄浙郡者也如魏相鮑永諸人舊浙江通志皆失載

今補

錄焉

黃霸

漢書本傳字次公淮陽陽夏人舉賢良為揚州刺史三歲宣帝下詔曰制詔御史其以賢良高

第揚州刺史霸為潁川太守霸以外寬內明得吏民心治為天下第一五鳳三年代丙吉為丞相封

建成侯自漢興言治民吏以霸為首

何武

漢書本傳字君公蜀郡郫縣人舉賢良方正徵對策拜為諫大夫遷揚州刺史所舉奏二千石

長吏必先露章服罪者為虧除免之而已不服極法奏之抵罪其餘賢不肖敬之如一是以郡國各

重其守相州中清平行部必先即學官見諸生試其誦論問以得失然後入傳舍出記問墾田頃畝

五穀美惡已乃見二千石以為常為刺史五歲入為丞相司直綏和元年為御史大夫更為大司空

封汜鄉侯

鮑永

後漢書本傳字君長上黨屯留人光武即位遷揚州牧時南土尚多寇暴永以吏人瘼傷之後

乃緩其銜轡示誅強橫而鎮撫其餘百姓安之後為兗州牧

張禹

後漢書本傳字伯達趙國襄國人舉孝廉建初中拜揚州刺史當過江行部中士民皆以江有

子胥之神難于濟涉禹將渡吏問請不聽厲言曰子胥如有靈知吾志在巡察枉訟豈危我哉遂鼓楫而過歷行郡邑深幽之處莫不畢到親錄囚徒多所明舉吏民希見使者民懷喜悅怨德美惡莫不自歸禹入為大司農拜太尉

馮緄

後漢書本傳字鴻卿巴郡宕渠人舉孝廉順帝以緄持節督揚州諸郡軍事與中郎將滕撫擊

破羣賊後為廷尉卒于官

劉祐

後漢書本傳字伯祖中山安國人舉孝廉為揚州刺史時會稽太守梁昱大將軍冀之從弟也

祐舉奏其罪昱坐徵遷祐河東太守

臧昱

後漢書臧洪傳洪廣陵射陽人父昱有幹事才熹平元年會稽妖賊許昭起兵向章自稱大將軍攻破城邑衆以萬數拜昱揚州刺史昱率丹陽太守陳黃擊昭破之昭遂復更屯結大為人患昱等進兵連戰三年破平之獲昭父子斬首數千級

三國吳

蔣欽

吳志本傳字公奕九江壽春人孫策東渡拜別部司馬遷西部都尉會稽治賊呂合秦狼等為

亂欽將兵討擊遂擒合狼五縣平定徙討越中郎將

呂岱

吳志本傳字定公廣陵海陵人孫權召署錄事出補餘姚長召募精健得千餘人會稽東治五

縣賊呂合秦狼等為亂以岱為督軍校尉與將軍
蔣欽等將兵討之遂擒合狼五縣平定拜昭信中
郎將嘉禾四年廬陵賊李桓路合會稽東治賊隨
春南海賊羅厲等一時並起權復召岱督劉纂唐
咨等分部討擊春首降岱
拜春偏將軍使領其衆

晉

周筵

晉書周處傳處義興陽美人子札札兄子筵卓
犖有才幹拜吳興太守遷太子右衛率王牧作

難加冠軍將軍都督會稽吳興義興晉陵東陽軍
事率水軍三千人討沈充未發聞其叔札開城納

敦憤咤慷慨形
于辭色尋遇害

王舒

晉書本傳字處明瑯琊臨沂人丞相導之從弟成帝時授撫軍將軍會稽內史在郡二年而蘇

峻作逆假節都督行揚州刺史庾冰奔舒舒率眾俱渡浙江顧眾顧颺等起義軍以應舒吳興太守虞潭率所領屯烏菴亭不敢進舒遣子允之以精銳三千邀賊于武康破之時臨海新安諸山縣並應賊舒分兵討之陶侃立行臺上舒監浙江東五郡軍事賊平以功封彭澤縣侯卒贈車騎大將軍儀同三司諡曰穆

顧眾

晉書本傳字長始吳郡吳人成帝時為義興太守蘇峻反眾還吳潛圖義舉時吳國內史庾冰

奔于會稽峻以蔡謨代之前陵江將軍張慙為峻收兵于吳眾遣人喻慙慙從之眾遣郎中徐機告謨謨檄眾為本國督護會稽內史王舒吳興內史虞潭並檄眾為五郡大督護統諸義軍潭遣將姚

休為衆前鋒與賊戰沒衆還守紫壁時賊黨方銳人咸勸衆過浙江衆曰不然今保固紫壁可得全錢唐以南五縣若越他境便為寓軍控引無所非長計也臨平人范明亦謂衆曰此地險要可以制寇不可委也衆乃版明為叅軍復進討賊峻平論功封鄱陽縣伯卒贈光祿大夫諡曰靖

蔡謨

晉書本傳字道明陳留考城人舉秀才元帝辟為掾轉叅軍後為中書侍郎歷義興太守遷侍

中蘇峻搆逆吳國內史庾冰出奔會稽乃以謨為吳國內史謨既至與張閭顧衆顧颺等共起義兵迎冰還郡峻平復為侍中賜爵濟陽男康帝即位代殷浩為揚州刺史卒贈侍中司空諡曰文穆

何充

晉書本傳字次道廬江濡人成帝時拜散騎常侍出為東陽太守除建威將軍會稽內史在郡

甚有德政薦徵士虞喜拔郡人謝奉魏顗等以為佐吏後去郡除丹陽尹建元初領揚州刺史

王述

晉書本傳字懷祖太原晉陽人少襲父爵出補臨海太守遷建威將軍會稽內史蒞政清肅終

日無事代殷浩為揚州刺史

却愔

晉書却鑒傳鑒高平金鄉人子愔字方回為臨海太守在郡優游頗稱簡默簡文帝輔政徵為

光祿大夫除太常深抱冲退樂補遠郡出為會稽內史桓溫遷愔都督徐兗青幽揚州諸軍事轉會稽內史簡文帝踐阼加都督浙江東五郡軍事以年老乞骸骨因居會稽徵拜司空詔書優美敦獎慙慙固辭不起

王薈

晉書王導傳導子薈字敬文少歷清官除吏部郎侍中吳國內史時年饑粟貴人多餓死薈以

私米作饘粥以餉餓者所濟活甚衆徵拜尚書領中護軍復為吳國內史轉督浙江東五郡左將軍

會稽內史加散騎常侍

按薈卿瑯臨沂人

劉牢之

晉書本傳字道堅彭城人孫恩陷會稽牢之遣將桓寶率師救三吳復遣子敬宣為寶後

繼率眾東討至吳與衛將軍謝琰擊賊屢勝徑臨浙江進拜前將軍都督吳郡諸軍事時謝琰屯烏程遣司馬高素助牢之牢之率眾軍濟浙江恩懼逃于海牢之還鎮恩復入會稽牢之進號鎮北將軍都督會稽五郡率眾東征屯上虞分軍戍諸縣及恩死牢之威名轉振

南北朝

蔡興宗

宋書本傳世祖時為臨海東陽太守遷會稽太守加都督會稽東陽新安永嘉臨海五郡

諸軍事會稽多諸豪右又幸臣近習蔡半宮首封畧山湖妨民害治興宗皆以法繩之會土全實民

物殷阜王公妃主邸舍相望大為民患子息滋長
督責無窮興宗悉啟罷省又陳原諸逋負解遣雜
役並見從三吳舊有鄉射禮久不復修興宗行之
禮儀甚整尋任荊州刺史封樂安縣伯 按興宗

濟陽考城

人廓子

蕭子良

南史本傳字雲英武帝第二子宋昇明三年
為會稽太守都督五郡封聞喜公子良敦義

愛古郡人朱百年有至行朱卒賜其妻米百斛
一人給其薪夏禹廟咸有禱祀子良曰禹泣辜表
仁菲食旌約服玩果粽足以致誠使歲獻扇簞而
已時有山陰人孔平詣子良訟嫂市米負錢不還
子良歎曰昔高文通與寡嫂訟田義異于此
乃賜米錢以償平武帝即位封竟陵郡王

蕭映

南史本傳字宣光高帝第三子仕宋位給事黃
門侍郎南兖州刺史高帝踐阼改都督揚州刺

史蒞事聰敏府州曹局皆重足以奉
禁令永明元年為侍中驃騎將軍

蕭景

南史本傳字子照梁武帝從父弟也仕齊為永
寧令政為百城最永嘉太守范述曾居郡號稱

廉平推服景為政乃榜郡門曰諸縣有疑滯者可
就永寧令決以疾去官永嘉人胡仲宣等千人詣
闕表請景為郡武帝踐阼封吳平縣侯天監十五
年詔景為安右將軍監揚州置佐史在州尤稱明
斷符教嚴整有田舍老姥訴得符還至縣縣吏未
即發姥語曰蕭監州符如火汝手何敢留之具為
人所畏
敬如此

程靈洗

陳書本傳字元滌新安海寧人以勇力聞梁
末侯景據有新安湘西侯蕭隱奔靈洗靈洗

奉以主盟劉神茂自東陽建義靈洗與神茂相應
元帝授持節通直散騎常侍都督新安郡諸軍事

景敗進軍建德擒賊帥奉所部下揚州助王僧辯鎮防遷吳興太守陳紹泰元年授信武將軍封遂

安縣侯

賀若弼

隋書本傳字輔伯河陽雒陽人高祖拜弼為吳州總管委以平陳之事開皇九年大舉伐

陳以弼為行軍總管平陳後帝勞之曰克定三吳卿之功也加上柱國封宋國公

楊素

隋書本傳字處道弘農華陰人為行軍總管浙江賊帥高智慧自號東揚州刺史船艦千艘屯

據要害兵甚勁素擊之自旦至申苦戰而破智慧逃入海素躡之從餘姚泛海趣永嘉智慧來拒戰素擊走之擒獲數千人賊帥汪文進據東陽進討悉平之又破永嘉賊帥沈孝徹于是步道向天台指臨海郡逐捕遺逸寇前後百餘戰智慧遁守閩越詔令馳傳入朝素以餘賊未殄恐為後患又自

請行乃下詔任以大兵總為元帥素復乘傳至會稽汎海追捕執智慧斬于泉州自餘支黨悉未降

附江南

大定

來護兒

隋書本傳字崇善江都人平陳之役有功進位上開府從楊素擊高智慧于浙江而賊據

岸為營周亘百餘里船艦被江鼓譟而進素令護兒率數百輕艫徑登江岸直掩其營破之智慧窮

威遁走進

位大將軍

謹按舊浙江通志名宦總部自周至隋共一十六人重加考訂陳惲當入杭州嚴州祠祀志高史君當入嘉興陸慧曉當入紹興劉裕即宋武帝不當列于名宦江子一慕容三藏並無政績孫韶係孫策之屬籍及沈懷文周文育俱浙江人當入人物志茲從諸史舊志採錄凡三十一人

唐

李大亮

唐書本傳京兆涇陽人大亮有文武才畧高祖擢越州都督貞觀八年為劍南道巡省大

使性忠謹外若不能言而內剛烈不可干以非義在越州寫書數百卷及去留都督署

龐玉

萬歷紹興府志京兆涇陽人魁梧有力明軍法仕隋為監門直閤率萬騎降高祖以隋舊臣禮

之授領軍武衛二大將軍加越州都督威望甚著盜不敢入境卒贈幽州都督工部尚書越人思其遺澤祠為城隍之神

狄仁傑

唐書本傳字懷英并州太原人高宗時拜冬官侍郎持節江南巡撫使吳楚俗多淫祠仁

傑一禁止凡毀千七百房止留夏禹吳太伯季札伍員四祠而已轉文昌左丞中宗贈司空封梁國

公

李濬

舊唐書良吏傳濬隴西人開元初置諸道按察使咸選能吏以濬為江南東道按察使封真源

縣

子濬誠信待物稱為良吏去

職有遺愛贈戶部尚書諡曰成

齊澣

嘉靖浙江通志字洗心定州義豐人開元二十六年為江南東道採訪使先是廢鄆州為鄆縣

隸越州澣始奏請復為州以境內有四明山故號為明州招集流民五百戶安輯之天寶初召為太

子詹
事

劉晏

唐書本傳字士安曹州南華人天寶末拜度支郎中兼侍御史領江淮租庸事晏至吳郡而永

王璘反採訪使李希言假晏守餘杭晏因發義兵堅壁王聞晏有備遂自晉陵西走終不言功代宗

時拜御史大夫領江淮轉運使移書元載陳四利
四病載以漕事委晏晏盡其才歲輸至天子勞曰
卿朕鄴侯也凡歲致四十萬斛初晏分置諸道租
庸使慎簡臺閣士專之皆新進銳敏盡當時之選
勉督倚辦
故能成功

王栖霞

舊唐書本傳濮州濮陽人上元元年王嶼為
浙東節度使奏為馬軍兵馬使廣德中袁晁

亂台州盡有浙江之地御史中丞袁孝儻東討奏栖
曜為偏將連日十餘戰生擒袁晁收復郿邑授浙
江都知
兵馬使

李栖霞

唐書本傳字貞一世為趙人舉進士代宗時
平盧行軍司馬許杲恃功擅留上元有窺江

吳意拜栖霞為浙西都團練觀察使岡之栖霞至張
設武備遣辦士厚齎金幣抵杲軍賞勞使士歆愛

奪其謀果懼悉衆渡江又增學廬表宿儒河南褚
沖吳何員等起拜學官為之師身執經問義遠邇
趨慕至徒數百人又奏部豪姓多徙貫京兆河南
規脫徭科請量產出賦以杜姦謀詔可尋拜御史
大夫

韓滉

舊唐書本傳字太沖京兆長安人大歷十二年
拜浙江東西都團練觀察使尋加鎮海軍節度

使滉安輯百姓均其租稅未及踰年境內稱理滉
師之亂滉以兵三千人臨金山江南兩浙轉輸粟
帛府無虛月朝廷賴焉興元二年特封晉國公上
以滉浙江東節度素著威名加江淮轉運使尋加
度支諸道轉
運鹽鐵等使

李若初

冊府元龜趙郡人貞元中為浙西觀察使善
於吏道時錢少貨輕州縣禁錢不出境商賈

不通若初始奏縱錢以起萬貨詔
可而性剛嚴強力東下吏人畏服

皇甫政

嘉泰會稽志貞元三年自權知宣州刺史授
浙東觀察使紹興府志政在鎮十年多惠蹟

修治水利開鑿玉山朱儲二
斗門以時蓄洩民甚德之

王緯

唐書本傳字文卿并州太原人德宗進緯給事
中浙西觀察使缺宰相李泌擬緯帝曰黃門要

地獨不留議事耶對曰浙西賦入尤劇緯清而忠
能惠養民故請遣之制可初州縣有韓滉時罰錢
未入者十八萬緡府吏請哀為進奉緯上疏願蠲
以紓民詔聽之貞元十年加御史大夫兼諸道鹽
鐵轉
運使

裴肅

舊唐書裴休傳休河南濟源人父肅貞元中越
州刺史浙東團練觀察等使時山賊栗鏐誘山

越為亂陷浙東郡縣肅帥台州兵討平之
因紀其事號平戎記上之德宗嘉賞焉

閻濟美

舊唐書良吏傳濟美登進士第貞元末自婺
州刺史為浙西觀察使以簡澹為理常賦之

外不知其他入
拜右散騎常侍

薛戎

舊唐書本傳字元夫河中寶鼎人閻濟美為福
建觀察使奏充副使又隨濟美移鎮浙東累改

衡湖常三州刺史遷浙東觀察使所莅皆以政績
聞檢身處約不務虛名俸入之餘散于宗族身歿
之後人無識焉唐書本傳所部州餉酒
禁者死槁未貢先驚者死戎弛其禁

楊於陵

唐書本傳字達夫弘農人貞元末進浙東觀
察使越人饑請出米三十萬石撫贍貧民政

聲流聞入為京兆尹
以尚書左僕射致仕

李遜

舊唐書本傳字友道趙郡人元和初為衢州刺史以政績殊尤遷越州刺史兼御史大夫浙東都團練觀察使先是貞元初皇甫政鎮浙東福建兵亂逐觀察使吳詵政以所鎮實壓閩境請權益兵三千俟賊平而罷賊平三十年而所益仍舊遜視事數日舉奏停之遜為政以均一貧富扶弱抑強為已任故所至稱理長慶元年進位檢校吏部尚書

孟簡

嘉靖浙江通志字幾道德州平昌人舉進士為睦州刺史元和中進浙東觀察使于山陰縣北開新河又于縣西北開運道塘與韓愈友善以文學名

竇易直

唐書本傳字宗元京兆始平人元和中為浙西觀察使長慶二年江淮旱漕物淹積不能前部將王國清指漕貨激眾謀亂易直知之械國清送獄其黨數千羣罷入獄篡取之欲大剽易直

登樓令曰能誅亂者一級賞千萬衆喜反縛為亂者三百餘人易直悉斬之入為戶部侍郎同平章事謚

恭惠

薛革

舊唐書良吏傳河東寶鼎人遷浙江東道觀察使以理行遷浙江西道觀察使廉風俗守法度

人甚安之理身儉薄常衣綠袍十餘年不易因加賜朱紱然後解去除左散騎常侍致仕

元稹

白居易元君墓誌字微之河南人穆宗時拜浙東觀察使先是明州歲進海物其程日馳百里

稹至即奏罷之辨沃瘠察貧富均勞逸以完稅籍冬築陂塘春貯雨水夏溉早苗農人賴之無餓殍會稽山水奇秀所辟幕職皆當時文士鏡湖秦望之游諷詠詩什動盈卷帙副使竇羣與之酬唱最多至今稱蘭亭絕唱在越八載政成課高加檢校禮部尚書入為尚書左丞

陸亘

唐書本傳字景山蘇州吳人浙東觀察使文明

嚴重以善政稱温州瀕海經賊亂奪官吏半祿
代民租後相沿更以為奸亘還
官全廉繩賊罪吏畏而賴之

崔郾

舊唐書本傳字廣畧清河武城人舉進士敬宗
時浙江西道都團練觀察使用寬政安疲人清

簡少事財用有餘卒
贈吏部尚書諡曰德

丁公著

唐書本傳字平子蘇州吳人舉明經高第穆
宗授浙西觀察使徙為河南尹治以清靜聞

長慶中浙中災厲拜觀察使詔賜米
七萬斛使賑饑民久之入為太常卿

李德裕

舊唐書本傳字文饒趙郡人穆宗即位召入
翰林充學士後為浙西觀察使儉于自奉留

州所得盡以贍軍俗信巫祝惑鬼怪有父母兄弟
屬疾者舉室棄之而去德裕擇鄉人之有識者諭

之以言繩之以法槩風頓革屬郡祠廟按方志前
代名臣賢后則祠之除淫祠一千一十所人樂其
政敬宗即位詔浙西造銀盞子粧具二十事進內
又詔進可幅盤條繚綾一千匹德裕具論奏罷優
詔報之德裕身居庶鎮傾心王室遣使獻丹宸箴
宵衣正服罷獻納誨辯邪防微六首帝手詔答焉
文宗即位加儉校禮部尚書德裕在浙西八年雖
遠闕廷每上章言事文宗素知忠藎採朝論徵之
太和八年改鎮海軍節度蘇常杭潤觀察等使九
年授太子賓客分司明年復浙西觀察使凡三鎮
浙西前後十餘年武宗即位授門下侍郎同平章事

敬晦

唐書本傳字日彰河中河東人進士及第大中
中浙西觀察使時南方連饑有詔弛榷酒茗官

用告要晦處身儉勤貲
力遂充徙充海節度使

王式

唐書本傳太原人大中中劇賊裴甫亂明越觀察使鄭祗德不能討宰相選式往代懿宗問方

畧對曰第假臣兵寇不足平也詔益許滑淮南兵式發自光福里第麾幟皆束靡獵獵有聲喜曰是謂得天時矣聞賊用騎兵乃閱所部得土蕃回鶻遷隸數百發龍皮監牧馬起用之集土團諸兒為鄉導擒甫斬之加檢校右散騎常侍餘姚民徐澤專魚鹽之利慈谿人陳瑛冒名仕至縣令皆豪縱不能制式曰甫竊發不足畏若澤瑛乃巨猾也窮治其姦皆榜死咸通三年徙武寧節度使

王龜

冊府元龜字大年太原人咸通中為浙東觀察使凡天下有倉庫羨餘皆隸于本州名曰賞設

庫以備地主之費龜則有給于公者給之或遊客故人皆以己俸奉之初龜為同州刺史有惠政浙人聞其至惟迎馬卒贈工部尚書

裴璩

嘉靖浙江通志絳州聞喜人乾符四年為浙江鎮海節度使值浙西狼山鎮遇使王郢作亂璩

密招其黨朱實降之散其徒六七千人郢奔明州五年曹師雄寇湖州璩遣兵擊破之官至太子太師

謹按舊通志名宦總部唐代一十八人重加考訂汪華當入祠祀李緝當入衢州趙隱政績未善而洪經綸臣于朱泚劉巨容高駢在藩鎮中尤稱悖逆持為刪去又于唐書中補錄一十五人共得二十人蓋高宗時之江南道玄宗時之江南東道肅宗代宗時之江淮轉運使浙江固在統轄內也

五代

元德昭

吳越備史字明遠撫州南城人姓危氏武肅更曰元起家鎮東軍節度巡官錢塘縣令累

授睦州軍事判官知台州新亭監文穆襲國遂掌
文翰忠獻王時南閩用師凡兵機細務悉以委之
尋拜丞相德昭厚重多謀臨事不撓每屬嚴警議
者盈庭德昭至則他論皆息軍中有不識理者德
昭以事諭之
無不聽服

饒景

十國春秋青州淄水人唐廣明時杭州建八都
景為唐山都將事武肅王為鎮海軍紫溪鎮遏

使累有
防禦功

郭師從

嘉靖浙江通志合肥人仕吳越為浙東馬步
都虞候從文穆王破廣德征無錫皆有功

累遷浙西營田副使忠獻王
時以累勲拜同參相府事

謹按舊通志名宦總部五代共八人重加考訂黃
晟曹信曹仲達俱係浙人當入人物林鼎不當入

名宦皮光業沈崧均無在任政績可考故刪去外增饒景一人

宋

范旻

宋史本傳字貴參大名宗城人太平興國初錢俶獻地以旻惟知兩浙諸州軍事旻上言俶在

國日徭賦繁苛凡薪粒蔬果箕帚之屬悉收算欲盡釋不取以蠲其弊從之

楊克讓

宋史本傳字慶孫同州馮翊人太平興國初為兩浙西南路轉運使居官廉謹幹局有聲

每視事自旦至暮或通夕斷決如流無有凝滯當時稱為能吏

翟守素

宋史本傳濟州任城人太平興國三年錢俶獻浙右之地詔守素為兩浙諸州兵馬都監

安撫諸郡人心甚悅卽以知杭州守素性謹慎寬仁容衆凡斷大辟獄雖罪狀明白仍徧詢僚案僉

同而後決屬吏有過不面折必因公宴
援往事之相類者言其獲咎以微警之

周渭

宋史本傳字得臣昭州恭城人建隆初上書言
時務召試賜同進士出身太平興國中進殿中

侍御史改兩浙東路轉運使歷彰信軍節度副使
咸平二年真宗聞其清節召還卒貧不克葬賜賻

錢十萬

樂史

嘉靖浙江通志字子正撫州宜黃人南唐進士
宋太宗時復登甲科累官兩浙巡撫使釋逋負

賑饑民著有太
平寰宇記諸書

李若拙

宋史本傳字藏用京兆萬年人舉進士淳化
二年為兩浙轉運使質狀魁偉尚氣有幹才

楊允恭

宋史本傳漢州綿竹人太宗時命督江南水
運以功轉江淮兩浙都大發運擘畫茶鹽捕

賊事先是三路轉運使各領其職或慮庾多積而軍士舟楫不給惟以官錢僱丁男挽舟土人憚其役以是歲上供米三百萬允恭盡籍三路舟卒與所運物數令諸州擇牙吏悉集允恭乃辦數授之江浙所運止于淮泗由淮泗輸京師行之一歲上供者六百萬咸平初命允恭為荆湖江浙都巡檢使

夏侯嶠

王惟儉宋史記字峻極鉅野人太平興國進士咸平二年秋江浙饑命為江南巡撫使所過疏理刑訟存問耆老務從寬簡人以為便使還采病民二十餘事上之亟詔釐革

劉師道

宋史本傳字損之一字宗聖開封東明人雍熙進士咸平三年為淮南江浙荆湖發運使

敏于吏事所至有聲吏民畏愛

孫冕

嘉靖浙江通志字伯純新淦人雍熙進士咸平中為兩浙轉運使治獄不濫斷訟如神弛張在

已無所吐茹吏

畏而民愛之

任中正

東都事畧字慶之曹州濟陰人舉進士真宗時擢兩浙轉運使民饑中正發官廩以賑之

累遷兵部尚書諡康懿

李防

宋史本傳字智周大名內黃人舉進士累遷秘書丞二浙民饑建言逃戶田宜即召人耕種使

人不敢輕去畝而官賦常在又請京師置折中倉聽人入粟以江浙荆湖物價之景德初江南旱

與張知白分東西路安撫上言秦義當增江淮兩浙荆湖榷酤錢民頗煩擾詔悉罷之遂為江南轉

運累遷兵部郎中擢諫議大夫

曹克明

宋史本傳字堯卿為溫台等七州都巡檢使景德中改供備庫副使知邕州代還真宗問

南方事對稱旨遷江淮兩浙都大提舉捉賊克明使人捕賊輒出私錢資之以故人人盡力視賊中趨勇者釋縛使還捕其黨前後獲千餘人

陳堯佐

東都事畧字希元閬州閬中人舉進士為兩浙轉運使錢塘江隄以竹籠石而潮齧之不

數歲輒壞而復理堯佐議實薪土以易之或言其不可後隄久不成仍用薪土景祐四年拜同中書

平章事

諡文惠

韓億

張方平韓億傳字宗魏真定靈壽人咸平進士除殿中侍御史淮浙饑命億安撫所至先察吏

治宣布慈惠救荒之政累舉景祐二年授參知政事

孫長卿

宋史本傳字次公揚州人天禧中官浙江荆淮發運使歲漕米至八百萬或疑其多長卿

曰吾非欲事羨贏以備饑歲爾轉兵部侍郎長卿長于政事為能臣性潔廉不以一毫取諸人

張傅

宋史本傳字巖卿亳州人進士第累遷兩浙轉運使強力治事審覈簿書勾擿奸隱州縣憚之

傅曰奚為我憚哉吾所以事事致察者正所以愛州縣也吏不敢慢則州縣不復犯法矣後以工部侍郎致仕

鍾離瑾

宋史本傳字公瑜廬州合肥人舉進士提點兩浙刑獄衢州饑聚餓者食之頗廢農作請

發米二萬斛賑給家毋過

一斛還尚書刑部郎中

王琪

宋史本傳字君玉成都華陽人起進士歷兩浙淮南轉運使入判太常寺出知杭州以禮部侍

郎致仕琪性孤介不與時合數臨東南名鎮政尚
簡靜每疾俗吏飾厨傳以沽名譽故待賓客頗闊

畧間造罪語起
謗終不自恤

段少連

宋史本傳字希逸開封人權杭州觀察判官
後為兩浙轉運副使舊使者所至郡縣索簿

書不暇殫閱往往委之吏胥吏胥持以為貨少連
命郡縣上簿書悉緘識遇事間指取一二自閱摘
其非是者按之餘不及閱者全緘識以還由是吏
不能為奸部吏有過名語曰聞子所為若此有之
乎有當告我容汝自新苟以為無吾不使善人被
謗即為汝辨明矣吏不敢欺皆以實對秀州獄死
無罪人時少連在杭吏畏恐聚謀偽為死者服罪
歟未及綴屬少連已挈舟入城訊獄吏具服請罪
以為神明徙使淮
南兼發運司事

張夏

七脩類藁字伯起雍邱人太宗朝進士景祐中出為兩浙運使杭州江岸率多薪土潮水衝激

不過三歲輒壞夏令作石堤一十二里以防江潮既成抗民德之慶厯中立廟堤上

田瑜

宋史本傳字忠資河南壽安人舉進士慶厯中為兩浙轉運按察使杭州龍山堤歲決水冒民

居輒賦窮塞之瑜與民約每窮十束更輸石一尺率五歲得石百萬為石堤堤固而歲不調民仕至

龍圖閣

直學士

孫瑜

宋史本傳字叔禮博平人為兩浙轉運使先是郡縣倉庾以斗斛大小為奸瑜奏均其制黜吏

之亡狀者民大喜有言其變新器非便下遷知曹州尋有言瑜所作量法均一誠便者乃還其元資

累官工

部侍郎

葉清臣

宋史本傳字道卿蘇州長洲人天聖進士知秀州累遷兩浙轉運副使太湖有民田豪右

據上游水不得洩而民不敢訴嘗建請疏盤龍漚滬瀆港入于海民賴其利皇祐元年為侍讀學士

知河陽

許元

歐陽脩許元墓誌字子春宣城人仁宗時京師粟少而江淮歲漕不給以元為江淮兩浙荆湖

發運判官元曰以六路七十二州之粟不能足京師者吾不信也至則治千艘浮江而上所過州縣留三月食其餘悉發而州縣之廩遠近以次相補由是不數月京師足食既而嘆曰此可為於乏時然歲漕不給者有司之職廢也乃考故事明約信令發斂轉徙至于風波遠近遲速賞罰皆有法凡江湖數千里外談笑治之不擾不勞而用以足官至工部郎中天章閣待制

鄭向

宋史本傳字公明開封陳留人舉進士為兩浙轉運副使疏漕河抵于江人以為便復為鹽鐵

判官以龍圖閣直學士知杭州

吳奎

宋史新編字長文濰州北海人舉五經皇祐中兩浙轉運使喜獎廉善有所知輒言仕至叅知

政事沒之日家無餘資

孫甫

歐陽脩孫甫墓誌字之翰許州陽翟人天聖進士歷兩浙轉運使范文正公守杭州以大臣或

便宜行事甫曰范公貴臣也吾屈于此則不得伸于彼矣由是一切繩以法然退而未嘗不稱其賢也嘉祐元年遷河北轉運使

林從周

嘉靖浙江通志潮州人登進士第累官浙東提點刑獄率多平反

侯叔獻

嘉靖浙江通志字景仁宜黃人慶歷進士累官兩浙常平使者兼鄱水監建議置提舉淤

田司相地利引水灌田四十萬頃治水得性每詔獎諭

王鼎

宋史本傳字鼎臣館陶人進士第提點兩浙刑獄累遷淮南兩浙荆湖制置發運副使前使者

多漁市南物因奏計京師持遺權貴鼎一無所市獨悉意精吏事事無大小必出于已凡調發綱吏度漕路遠近定先後為成法於是勞逸均吏不能為重輕官舟禁私載舟兵無以自給則盡盜官米為奸有能居販自贍者市人持以法不肯贖所通鼎為移州縣督償之舟人有以自給不為奸而所運米未嘗不足入為三司鹽鐵副使鼎自奉儉約當官明敏強直不可撓所薦士多知名

薛向

宋史本傳字師正河中人神宗知向才以為浙江荆淮發運使綱舟歷歲久蒿工利于盜貨嘗

假風水沉溺以滅迹向募客舟分載以相督察官舟有定數多為主者冒占悉奪畀屬州諸運皆詣本曹受遣以地有美惡利有重輕為立等式用所漕物為誅賞遷天章閣待制

李復圭

宋史本傳字審言徐州豐人歷兩浙轉運使浙民以給衙前役多破產復圭悲罷遣歸農令出錢助長召人承募民便之瀕海人賴給沙地以生豪家量受稅于官而占為己有復圭奏蠲其稅分以與民熙寧初進直龍圖閣知慶州

沈立

宋史本傳字立之歷陽人舉進士累遷兩浙轉運使蘇湖水民艱食縣戒強豪民發粟以賑立亟命還之而勸使自稱貸須歲稔官為責償茶禁害民山場堆場多在部內歲抵罪者輒數萬而官僅得錢數萬立著茶法要覽乞行通商法如所請召為戶部判官出為江淮發運使知越州杭州

張載

伊洛淵源錄字子厚世大梁人家鳳翔郿縣嘉祐進士熙寧二年除崇文院校書命案獄浙東

或曰張載以道德進不宜使之治獄執政曰淑問如皋陶猶且獻獄此庸何傷明刑弼教多所平反焉

蔣之奇

東都事畧字穎叔常州宜興人舉進士英宗立擢江淮荆浙等路發運副使元豐六年漕

六百二十萬石至京師始建鑿泗州股渠以避長淮之險自是無溺者崇寧九年除觀文殿大學士知杭州以疾告歸

韓晉卿

宋史循吏傳字伯修密州安丘人以五經中第歷嘉興主簿元祐初知明州兩浙轉運使

時差役法復行諸道處畫多倉卒失叙獨晉卿視民所宜而不戾法指入為大理少卿

張康國

宋史本傳字賓老揚州人第進士紹聖中提舉兩浙常平豪猾望風斂服發倉救荒江南

就食者活數萬口

徙福建轉運判官

曾孝蘊

宋史曾公亮傳孝蘊字處善泉州晉江人紹聖中提舉浙江常平改轉運判官徽宗時徙

江浙荆淮發運以顯謨閣待制知杭州宣和二年知歙州方臘起青溪復改杭州時賊已破杭孝蘊單車至城下城既克復軍士多殺人孝蘊下令從者得毋毋輒殺皆束手不敢驚論功進顯謨閣直

學士

李椿年

西江志字仲永浮梁人政和進士歷官兩浙轉運使檢括隱漏別為圖籍凡二十四條該

盡田畝形勢閱七月告成陞戶部侍郎

陳邁

宋史本傳字亨伯永州人登進士第宣和二年方臘亂加龍圖閣直學士經制七路治于杭劾

越州王仲巖糾市民造金茶器減直買軍糧券而以私錢取之仲巖坐黜杭經巨寇後河渠湮塞邦人以水潦為病邁以冬月檄真揚潤楚諸郡凡所貼網卒悉集治所用其力治河不兩月畢杭人利焉徙河北鄆轉運使

王士言

宋史本傳武舉進士累立戰功宣和初方臘為寇詔擇才畧之士馮熙載薦為東南第三

將首解嘉興之圍靖康元年詔以浙西兵往河東防秋金人入澤州士言戰死贈拱衛大夫忠州團練使

王復

蘆浦筆記字景仁淄州淄川人以門蔭補官歷兩浙轉運副使方臘初叛所過守將望風奔駭

復下令所部嚴堡壘脩戰備竭力討賊屢戰有功
賊平擢蕨猷閣待制遷都轉運使朱勔以花石奉
艮岳多取漕艦以載號直達網復曰今冠起倉卒
飛輓繁困而佞幸之徒猶欲以苑囿惑上心固執
不與復疏奏謂必不可以不急之務疲民費財
擢龍圖閣直學士後贈資政殿學士諡壯節

柳約

宋史本傳字元禮華亭人大觀上舍進士靖康
初以直龍圖閣知台州徙嚴州兼浙西兵馬都

監節制管内軍馬金人大入列郡震恐約屹保孤
城悉力捍禦境內安堵上書請糾合諸郡克復吳
會上嘉其忠詔以軍興費出無藝吏慢弗虔柳約
獨謹賦輸率先程督進秩一等又詔約郡當兵衝
而能不辭難不避事保綏一方以
約允集英殿修撰擢權戶部侍郎

翟汝文

宋史本傳字公巽潤州丹陽人登進士第欽
宗即位知越州兼浙東安撫使建炎改元上

疏言正供常數後為獻利之臣所增者嘗議裁損如浙東和預買絹歲九十七萬六千匹獨越州尚如舊今乞視戶等第減罷紹興元年召為翰林學士兼侍講

趙叔近

宋史本傳魏悼王五世孫建炎元年為秀州守杭卒陳通反抵秀州城下叔近乘城諭以禍福亂兵乃去未幾差擢兩浙提刑叔近招通通聽命叔近以數十人入城衆猶不解甲叔近置酒推誠待之遂皆感服城中稍定紹興九年贈集英殿修撰

王淵

宋史本傳字幾道熙州人宣和五年劉延慶討方臘以淵為先鋒賊據錢塘淵諭小校韓世忠曰賊謂我遠來必易我明日爾逆戰而偽遁我以強弩伏數百步外必可得志世忠如其言賊果迫之伏弩卒發應弦而倒遂北至淳安賊據清溪峒遂圍而平之授閤門宣贊舍人康王即位以淵為

制置使平抗賊提兵四出所向皆捷遷向德軍節度使苗傅劉正彥怨淵及于難贈開府儀同三司

呂頤浩

宋史本傳字元直齊州人中進士第建炎二年拜同簽書樞密院事江淮兩浙制置使改

江東安撫制置使兼知江寧府時苗傅劉正彥為逆以兵發江寧將至平江張浚乘輕舟遁之相持而泣即舟中草檄進韓世忠為前軍張俊翼之劉光世為遊擊頤浩浚總中軍發平江傅黨託旨請頤浩單騎入朝頤浩奏所統將士忠義所激可合不可離傅等恐懼乃請高宗復辟師次臨平苗傅等拒戰頤浩被甲立水次出入行陣督世忠等破賊傅正彥引兵遁頤浩等以勤王兵入城都人夾道聳觀以手加額以頤浩守尚書右僕射中書侍郎兼御營使五年除少保浙西安撫制置大使知臨安府行宮留守明堂禮成進封成國公諡忠穆

張浚

宋史本傳字德遠漢州綿竹人進士第建炎三年以浚同節制軍馬會苗傅劉正彥作亂浚

起兵討賊會韓世忠舟師抵常熟浚因大犒將士令世忠以兵赴闕世忠至秀大治戰具傅等遣重兵扼臨平會呂頤浩劉光世兵踵至浚乃聲傳正彥罪傅檄中外率諸軍總進高宗除浚知樞密院事浚次臨平賊兵拒不得前世忠等搏戰大破之傅正彥走闕中浚命世忠追縛之以獻高宗以浚為川陝宣撫處置使孝宗即位拜尚書右僕射同中書門下平章事致仕諡忠獻

韓世忠

宋史本傳字良臣延安人宣和二年方臘反世忠以偏將從王淵討之次杭州賊奄至世

忠以兵二千伏北關堰賊過伏處衆譟亂世忠追擊賊敗而遁窮追至睦州清溪峒挺身仗戈直前渡險數里擒其穴擒臘以出建炎二年陞定國軍承宣使三年苗傅劉正彥反世忠舉酒酹神曰誓

不與此賊共戴天以所部發至秀州造雲梯置器械次臨平賊將苗翊馬柔吉負山阻河為陣中流植鹿角梗行舟世忠舍舟力戰軍少却世忠復舍馬操戈而前賊列神臂弩持滿以待世忠瞋目大呼挺刃突前賊辟易矢不及發遂敗傅正彥開湧金門遁詔授武勝軍節度使御營左軍都統制請于帝曰賊擁精兵距甌閩甚邇倘成巢窟卒未可滅請討之于是以為江浙制置使自衢信追擊至漁梁驛與賊遇世忠挺戈而前賊望見咋曰此韓將軍也皆驚潰擒正彥及傅弟翊送行在傅亡建康追擒之帝手書忠勇二字揭旗以賜授檢校少保武寧昭慶軍節度使諡忠武

張俊

宋史本傳字伯英鳳翔成紀人建炎元年為御營前軍統制討陳通于杭州蔣和尚等于蘭溪平之二年破秀州賊數萬縛徐明斬之苗傅劉正彥反張俊諭以起兵問罪韓世忠為前軍俊以精

兵翼之戰于臨平傅等兵敗俊入見帝拜御營右
軍都統制尋為浙東制置使金人渡江攻浙帝如
明州俊自越州引兵至帝御樓船如溫州留俊明
州拒敵癸卯除夕金兵至城下俊死戰破之戒將
士毋驕惰下令清野多以輕舟伏弩閉關自守四
年正月金人果復攻明州俊遣兵掩擊金人拔砦
去未幾江浙羣盜蠡起投俊兩浙西路制置使十
月浙西羣盜悉平改江南招討使紹興十二年封
清河郡王

劉光世

宋史本傳字平叔保安軍人以蔭補三班奉
職方臘反光世自將一軍趨衢發出其不意

破之建炎二年光世為行在五軍制置使苗劉為
亂張浚勤王光世以選卒為遊擊遇苗翊馬柔吉
軍于臨平與韓世忠等破之遷太尉御營副使尋
授浙西安撫大使後拜少師封榮國公追封鄜王

張子益

宋史本傳字德高初從韓世忠討苗傅補承信郎累功遷武功郎紹興十三年授龍神衛

四廂都指揮使兩浙西路馬步軍都總管

胡唐老

宋史忠義傳字俊明晉陵人崇寧進士建炎三年知衢州苗傅以兵犯城唐老拒之以功

擢秘閣修撰未幾兼浙西安撫使杜充降金潰卒戚方欲犯臨安妄言赴行在請唐老部衆以行唐老不從諭以逆順禍福方衆環脅之唐老怒罵遂遇害贈徽猷閣直學士諡忠愍

李迨

宋史本傳東平人以蔭補官建炎三年為御營使司叅議官兼措置軍前財用苗傅劉正彥叛

呂頤浩張浚集勤王之師迨流涕謂諸將曰君第行無慮軍食師行所至食皆先具事平除權戶部侍郎紹興五年除兩浙轉運使言祖宗都大梁時歲漕東南六百餘萬斛而六路之民無飛輓之擾

蓋所運者官舟所役者兵卒故也今駐蹕浙右漕運地里不若中都之遠而公私苦之何也以所用之舟大半取于民間往往鑿井沉舟以避其役如溫明虔吉州等處所置造船塲乞委逐州守臣措置募兵卒牽挽使臣管押庶幾害不及民可以漸復漕運舊制詔工部措置尋加徽猷閣直學士

楊存中

宋史本傳本名沂中字正甫代州崞縣人宣和末積功至忠翊郎遷閤門祇候建炎二年

討賊徐明于嘉興先登主帥將屠城存中力諫止之郡賴以全高宗南渡以勝捷軍從張俊守吳門苗劉之變又從俊赴難遷貴州團練使尋為御前右軍統領金人攻明州又從俊與田師中趙密殊死戰破之以奇功遷文州防禦使御前右軍統制紹興三年嚴州妖賊繆羅據白馬源存中討平之加保信軍承宣使後封同安郡王諡武恭存中御軍寬而有紀所用將士專以才勇選不私部曲之

舊

夏榮

嘉靖浙江通志字子顯大梁人累立戰功建炎間從張俊戰苗劉敗走之遷武經大夫金追帝

明州榮從楊沂中迎戰高橋身中十八鎗甲為赤勇氣益奮陞兩浙節度使封英國公

張宗顏

宋史本傳字希賢延安人張俊選為統領從俊討浙西寇秀州軍校徐明以城叛宗顏夜

襲其城明遁轉忠州刺史遷御前中軍統制金攻明州宗顏破其前軍後擢龍神衛四廂都指揮使

王德

宋史本傳字子華通遠軍熟羊砦人以武勇聞軍中呼王夜叉建炎元年以勤王隸劉光世三

年遷前軍統領光世討苗劉苗劉走閩中詔德追擊德斬苗瑒擒馬柔吉送行在紹興元年平秀州

賊邵青初德與青戰諜言將用火牛德笑曰是古法也可一不可再命合軍持滿陣始交萬矢齊發

牛皆反奔賊衆殲焉青自縛請命獻俘行在封隴西郡侯歷浙江總管

李寶

宋史本傳河北人金使蘇保衡出海道襲浙江乃授寶浙西路馬步軍副總管令督海舟捍禦

次江陰先遣子公佐潛伺動靜虛實公佐已挾魏勝得海州寶喜趣衆垂機進適大風作海濤如山寶神色不為動風少殺始縱舟泊抵東海敵已雲合圍海州旌麾數十里寶麾兵登因握槳前行遇敵奮擊將士賈勇無不一當十敵引去勝出城迎寶獎其忠義遣辨者四出招納降附聲振山東豪傑爭應寶檄所部會審之膠西命公佐以郎事昇勝與發至膠西石臼島敵引舟握刀持戰寶船鼓聲震疊海波騰躍敵大驚寶亟命火箭環射延燒數百艘斬其帥六人詔獎諭書忠勇李寶四字表其旗幟除靜海軍節度使沿海制置使

朱倬

宋史本傳字漢章閩縣人宣和進士高宗時梁汝嘉制置浙東表攝參謀有羣冠就擒屬倬鞠

問獨竄二人餘釋不問曰吾大父尉崇安日獲冠二百坐死者七十餘人大父謂此饑民剽食爾烏

可盡繩以法悉除其罪不以邀賞吾其可愧大父乎尋除浙西提舉紹興三十一年拜尚書右僕射

曾幾

宋史本傳字吉甫其先贛州人徙河南府賜上舍出身高宗時為浙西提刑會兄開與秦檜力

爭和議開去幾亦罷檜死起為浙西提刑知台州治尚清靜民安之黃巖令受賄為兩吏所持令械

吏置獄一夕皆死幾詰其罪或曰令丞相沈該客也治之益急除直秘閣孝宗初遣通奉大夫致仕

諡文

靖

謹按嘉靖浙江通志云幾起提點浙江東路刑獄時已老而精力不衰去大猾吏張鎬一路稱快本

傳不載其事
附識于此

李顯忠

宋史本傳初名世輔綏德軍青澗人也初其母當產數日不能免有僧過門曰所孕乃奇

男子當以劍矢置母旁即生已而果生顯忠立于蓐咸異之年十七隨父出入行陣補承信郎充隊將烏珠犯河南命顯忠為招撫司前軍都統制與李貴同破靈壁縣太后至臨安顯忠入覲加保信軍節度使浙東副總管因上恢復策忤秦檜意遂降官奉祠台州居住復寧國軍節度使金渝盟犯淮西和州失守顯忠選銳士萬人渡江盡復淮西州郡詔授淮南制置使擢太尉孝宗隆興元年兼淮西招撫使乾道改元復防禦觀察使浙東副總管提舉台州崇道觀召除威武軍節度使賜第京師乞祠提舉興國宮紹興府居住卒諡忠哀

謹按舊浙江通志載顯忠為浙東副總管討徐明於嘉興郡賴以全考顯忠于紹興九年歸朝時賊寇已平而本傳又不紀討徐明事所引恐有訛誤附記於此

趙子瀟

宋史宗室傳字清卿泰康惠王後宣和進士調衢州刑曹據推官胡唐老奇其才任之子

瀟佐唐老繕完城具苗劉兵至城下不能攻以功進一秩累官至敷文閣知臨安府吏不能欺禁權家餽人子女為僕妾者陞文華閣待制復知臨安府調三衙卒修築都城不擾而辦帝幸建康充行宮留守叅謀官還復知臨安府孝宗嗣位移知明州沿海制置使初海寇以略通郡胥吏吏反為用匿其踪跡賊熾商舶不通子瀟以禮延土豪俾率郡胥分道入海告之曰用命有厚賞否則殺無貸衆震恐爭指賊處悉擒獲凡豪猾為賊藪素者窮治之海道遂平陞龍圖閣直學士

王葆

周必大王葆墓誌字彥光吳郡崑山人宣和進士隆興元年為浙東提點刑獄會稽近行闕政

尚姑息葆屢行帥事疾惡彌厲歲歉請厚捐民租適寢疾主管台州崇道觀

金安節

宋史本傳字彥亨歙州休寧人宣和進士紹興時知嚴州除浙西提刑入為大理卿首言

治民之道先德後刑今守令慮不及遠簿書期會賦稅輸納窮日力辦之而無卓然以教化為務願中飭守令俾無專事律法苟可以贊教化必力行之兩浙漕屬王悅道鞠仁和令楊績獄不實事下大理安節并逮悅道悅道幸醫王繼先子也屢因人求免安節不從遷宗正少卿隆興改元拜兵部

侍郎

王珏

洪武蘇州府志字德全臨川人紹興二年起家鹽官丞秀州歲以錢給亭民煮鹽至十五年積

十九萬七千餘緡不給民訴於朝除珏提舉浙西
茶鹽逾年盡償亭民且贏鉅萬開華亭海河三百
餘里鹽滋得流通且溢以溉田舊兩浙鹺志經界
法行除其害者三百六十餘事其七千二百餘戶
為尤病珏奏除之兼提點刑
獄官至直敷文閣太傅少卿

顏師魯

宋史本傳字幾聖漳州龍溪人紹興進士除
浙東提舉尋改使浙西役法敝甚遇輒破家
師魯下教屬邑預正流水籍稽其役之序寬比限
免代輸咸便安之鹽課歲至鉅萬本錢久不給亭
竈私鬻禁不可止師魯搏帑緡盡償宿負戒官吏
無侵移比旁路課獨最農民有墾曠土成田未及
受租者奸豪多為已利師魯奏但當正其租賦不
應繩以盜種法失勸農重本意奏可遂著為令入
為監察
御史

朱熹

宋史本傳字元晦徽州婺源人紹興進士淳熙五年知南康軍提舉常平茶鹽公事會浙東大

饑宰相王淮奏改提舉浙東即日單車就道移書他郡募米商蠲其征及至則客舟之米已輻輳熹日勾訪民隱按行境內單車屏徒從所至人不及知郡縣官吏憚其風采至自引去所部肅然凡丁錢和買役法權酤之政有不便于民者悉釐而革之于救荒之餘隨事處畫必為經久之計舊雨浙巖志熹提舉浙東下社倉法于諸路條奏救荒事宜諸州利病乞取會福建下四州見行產鹽法于本路沿海四州上謂王淮曰朱熹政事却有可觀

張杓

宋史張浚傳浚漢州綿竹人子杓字定叟以父恩授承奉郎通判嚴州有能稱浙西使者薦所

部吏而不及杓孝宗特令再薦知衢州遷提舉浙西常平督理荒政湖州闕守命兼攝焉有執政姻

黨蔽翟杓首治之遷兩浙轉運判官未幾直徽猷閣陞副使知臨安府奏除逋欠四萬緡米八百斛都城浩穰姦盜聚匿杓畫分地以警捕夜戶不閉張師令納女掖廷供給使侍以恣橫杓因事痛繩之徙其家信州其類帖服修三牖復六井尋知紹興府光宗即位以刑部侍郎仍為府尹內侍毛伯益冒西湖菱地為亭外戚有殺其僕者獄具黃緣宣諭求免杓皆執奏論如律杓天分高爽吏材敏給遇事不凝滯多隨宜變通論尹京者以杓為首

龔興

嘉靖浙江通志湘陰人乾道進士剛介廉潔為浙東檢法隨憲按部郡饋遺皆不受身後家無

擔石之儲

劉燾

宋史本傳字晦伯建陽人乾道進士浙西提點刑獄巡按不避寒暑多所平反有殺人匿權家

者吏不敢捕燭竟獲之遷國子司業言浙西根本之地宜詔長吏兼司禁戢強暴撫柔善良務儲積

以備凶荒禁科歛以舒民力

官至權工部尚書諡文簡

鄭興裔

周必大鄭興裔神道碑字光錫開封人紹興四年用恩補成忠郎歷提點浙東刑獄淳熙

元年兼沿海制置使綱常賦撤私稅闕境便之累封郡侯贈太尉

孫峴

萬厯杭州府志字舉善以詞學擢第拜中書舍人淳熙初為浙西提舉以措置支還亭戶本錢

及增買鹽袋興修水利有勞除直敷文閣兩浙轉運使

程大昌

宋史本傳字泰之徽州休寧人紹興進士除浙東提點刑獄會歲豐酒稅踰額有挾朝命

請增額者大昌力拒之曰大昌寧罪去不可增也六和塔寺僧以鎮潮為功求內降給賜所置田產

仍免科徭大昌奏僧寺既違法置田又移徭于民奈何許之况自修塔之後潮果不齧岸乎寢其命

光宗嗣位知

明州尋奉祠

詹體仁

真德秀詹體仁行狀字元善浦城人進士乙科為湖州歸安丞光宗時提舉浙西常平體

仁謂浙右之有漕渠非止通餽運資國信往來而已蘇湖常潤田之高仰者實賴之於是開漕渠浚練湖置斗門為旱澇備又以餘力立舉子倉創安濟院所活不可勝紀官至司農卿

陳思誠

葉適陳思誠墓志字景思信州弋陽人光宗時為兩浙轉運判官陞副使延問窮民遮道

詞牒皆灼見庾隱予奪中情為抗學築門設戟儀比他州置錢塘左還監渡謹視重載覆溺者言紹興府和買重當減國之根本在州縣州縣根本在民欲寬州縣當裕民力進直煥章閣遷太府卿

羅點

萬歷杭州府志字春伯崇仁人淳熙進士由校書郎除浙西提舉規畫荒政凡數十奏躬行畝

畝施惠甚溥點端介不為矯激之行或謂天下事非才不辦曰當論其心心苟不正才雖過人果何

取也歷簽書樞

密院事諡文恭

李謙

江西通志字和卿虔之興國人淳熙進士累官太常寺丞提舉浙東值歲饑賑濟有方

汪綱

函史字仲舉歙人以蔭補官知蘭谿決陂如神歲旱饑郡倚辦勸分綱謂勸分所以助義倉不

逮耳一切行之非所以安富厚裕也願假常平錢為糴米使循環迭糴以濟又巡行諸水利可興者

勸浚築使饑者得食力全活甚衆而歲以有秋累遷直秘閣知婺州旱禱雨龍瑞宮有物蜿蜒盤旋

壇上綱曰吾欲雨而已毋為異惑衆須臾雨大至歲以大熟進直煥章閣知紹興主管浙東安撫司

公事兼提點刑獄蕭山運河淤久不可舟浚之復
創開江口使淤不可入梵途達城者十里屬邑咸
濱海而諸暨十六鄉瀕河蕩饒灌溉之利勢家率
封埴埂岸為圩田湖流束隘不得去雨稍多則溢
入邑居田廬數為敗網請治復之郡臨海道招
水軍置甲仗威重赫然後以權戶部侍郎致仕

牛大年

宋史本傳字隆叟揚州人慶元進士歷官
浙江提點刑獄清操凜然以廉潔自持

徐天麟

宋史徐夢莘傳天麟字仲祥臨江人開禧進
士歷臨安府教授浙江提舉常平司幹官所

至興學明
教有惠政

范應鈴

宋史本傳字旂叟豐城人開禧進士為浙東
提點刑獄開明磊落守正不阿所至無留訟

無滯獄繩吏不少貸進修潔案姦賊振樹風聲聞
者興起徐鹿卿曰應鈴經術似兒寬決獄似雋不

疑治民似龔遂風采似范滂理財
似劉晏而正大過之人以為名言

劉伯正

嘉靖浙江通志字直卿餘千人閒禧進士歷
浙西轉運使靜重鎮浮不釣名譽後以資政

殿學士提
舉洞霄宮

呂午

宋史本傳字伯可歙縣人嘉定進士授烏程主
簿郡守置之幕下事一決于午調知餘杭縣以

言罷浙東提舉章良明留之幕旋兼沿海制置司
事海寇未平良明問策安在午蘆知調軍出海糧
盡即還軍獲寇物官盡拘收乃與制置司幹官施
一飛議糧盡再給不許擅還賊舟所有悉以給軍
海道遂清差兩浙運司主管文字字拜監
察御史累遷浙江提刑復為監察御史

吳潛

宋史本傳字毅夫宣州寧國人嘉定進士授承
事郎通判嘉興府權發遣嘉興府事端平中知

慶元府魚沿海制置使授寶謨閣侍制改直學士
兼浙西提點坑冶權兵部尚書浙西制置使申論
防拓江海團結措置等事進吏部尚書兼知臨安
府論修德以求亨通之理帝嘉納授寶謨閣學士
知紹興府浙東安撫使淳祐年授沿海制置大使
判慶元府至官條具軍民久遠之計告于政府奏
皆行之又積錢百四十七萬三千八百有奇代民
輸帛前後所蠲五百四十九萬一千七百有奇以
久任丐祠
封榮國公

趙與權

宋史本傳字悅道燕懿王八世孫嘉定進士
直寶章閣知安吉州設銅鉦懸門以便憩寬

有富民愬幼子察之非其本心姑逮其子付獄徐
廉之乃二兄強其父析業與權曉以法開以天理
皆忻然感悟又嫠媪僅一子亦以不孝告留之郡
廳日為饌俾親饋晨昏以禮母子遂如初二家皆

畫像事之尋兼知臨安府浙西安撫使招刺三千人為忠毅軍言禁衛虛籍宜募兵財先贍軍餘始上供乞省不急之費遷吏部尚書會潮汐鬻隄授端明殿學士知臨安府浙西安撫使江隄竣事獄空力勾罷出闕遣使趣還歲饑與權榜諭賑救推誠勸分甘雨隨至米商來集流移者濟之授資政殿學士提舉萬壽觀與權三為府尹盡力民事都人稱趙端明必以手加額曰趙佛子也久之以舊職知温州政事必親吏不敢欺創水砦修貢院以侍讀召陞大學士後拜少傅追封奉化郡王諡清敏

吳淵

宋史本傳字道父宣州寧國人嘉定進士提點浙西刑獄會衢嚴盜起警報至調遣將士招捕之殲其渠魁散其支黨以功為樞密院檢詳諸房文字遷太府少卿進權工部侍郎提舉浙西沿海

諸州軍許浦澈浦等處兵船歲大侵因淵全活者
六十五萬八千餘人遷兵部尚書知平江府兼浙
西兩淮發運使竇祐

五年拜叅知政事

包恢

宋史本傳字宏父建昌人嘉定進士通判台州
徐鹿卿討溫寇辟兼提點刑獄司主管文字議

收捕改通判臨安府知台州有妖僧居山中號活
佛男女爭視之因為姦利豪貴風靡恢誅其僧累
除浙西提點刑獄時海寇為亂恢單車就道調許
澈浦分屯建砦一旦集諸軍討平之嘉興吏因和
羅受賕百萬恢被旨慮囚曰吾用此消沴氣乃減
死斷其手後以資政殿學士致仕恢破豪猾去奸
吏治蠱獄課益鹽理銀
欠政聲赫然謚文肅

徐鹿卿

宋史本傳字德夫隆興豐城人嘉定進士浙
東提點刑獄兼提舉常平鹿卿言罷浮鹽經

界鰲地先撤相家所築就捕者自言我相府人鹿
卿曰行法必自貴近始卒論如法丞相史彌遠之
弟通判温州利韓世忠家寶玩籍之鹿卿奏削其
官擢太府少卿兼右司居官廉約清峻毫髮不妄
取一廬僅庇
風雨諡清正

姚希得

宋史本傳字逢源潼川人嘉定進士理宗時
為戶部侍郎帝曰姚希得才望可為閫帥乃

進煥章閣待制知慶元府沿海制置使詔增沿海
舟師希得為之廣募水軍造戰艦蓄糧食蠲米一
萬二千石舊逋一百萬去官庫餘羨悉以代民輸
名為工部尚書後以資政殿大學士潼川郡公致
仕

高斯得

宋史本傳字不妄邛州蒲江人紹定進士通
判紹興府台州知嚴州嚴環山為郡雖豐歲

猶仰他州夏旱斯得蠲租發廩招糴勸分請于朝
得米萬石以振濟遷浙東提點刑獄遂劾知處州
趙善瀚知台州沈堅等七人以勢屬民疏上不報
改江西轉運判官斯得具辭上奏曰臣劾奏趙善
瀚等七人未聞報可祖宗以來未有監司按吏一
不施行者臣身為使者劾吏不行反叨易節若貪
榮冒拜與頑鈍無耻者無異乞併臣鑄罷以戒奉
使無狀者章上七人竟罷去仕至端明殿學士兼
叅知

政事

胡穎

宋史本傳字叔猷潭州湘潭人紹定進士歷官
浙西提點刑獄榮王府十二人行劫穎悉斬之

一日輪對理宗曰聞卿好殺意在折獄穎曰臣
不敢屈太祖之法以負陛下非嗜殺也帝默然

王積翁

黃潛王積翁墓誌字良存福之長溪人用蔭
補承務郎調監嚴州都酒務吳潛分閫四明

辟奉國軍節度使推官改沿海制置大使司幹辦
公事累數十年不決之訟悉以委之凡所剖析三
百餘事除浙西安撫使幹辦公事奉朝旨決六縣
獄單車夜至餘杭閱獄囚一百七十悉得其情當
坐者僅數人餘皆平民明日召縣官盡釋之所平
反他邑疑獄全活甚衆改秩差知富陽縣治辦為
諸邑最秩滿除兩浙轉運司主管文字力
請寬版曹催科之限東南諸郡咸便之

呂沆

宋史本傳字叔朝端平三年銓試第一授黃巖
縣主簿知於潛縣重囚逸聞沆至自歸通判發
州朱君章訟田四十有二年吳王府爭墓二十有
九年沆皆決之特差充提領兩浙轉運鹽事使司
主管文字賈似道議行公田沆請罷還民似道矯
詔廢十七界會行闕子沆力言非便似道大怒調
將作監簿久之典靈臺觀德
祐九年召赴行在不復出

李芾

宋史本傳字叔章其先廣平人徙家衡州芾以蔭補差知德清縣屬浙西饑置保伍振民活數

萬計有妖人煽民為亂至數萬人芾討之盜聞其來眾立散除司農寺丞以浙東提刑知温州州瀕海多盜芾至盜息移浙西時浙西亦多盜羣穴太湖中芾跡得其出沒按捕之盜亦駭散咸淳元年入知臨安府時賈似道當國前尹事無鉅細先關白始行芾獨無所聞福王府有迫人死者似道力為營救芾以書往復辯論竟置諸法嘗出閱火具民有不為具者問之似道家人也立杖之似道大怒誣以贓罪罷之起為湖南提刑知潭州兼湖南安撫使元兵入潭死之贈端明殿大學士諡忠節

汪立信

宋史本傳臨邛人澈從孫也淳祐進士景定初官浙西提點刑獄即嘉興治所講行荒政

咸淳十年為端明殿學士沿江制置使江淮招討使建康兵潰扼吭而死贈太傅

文天祥

宋史本傳字宋瑞廬陵人竇祐進士咸淳十年知贛州德祐初元師渡江詔諸路勤王天

祥奉詔發郡中豪傑萬人入衛明年除知臨安府尋拜右丞相令詣北軍請和巴延折以危言天祥曰天祥為宋狀元宰相所欠只一死報國耳刀鋸鼎鑊非所懼也巴延挾天祥北行中道計脫泛海至溫州晉左丞相仍以都督出江西加少保封信國公兵駐南嶺元兵奄至為所執送燕居兵馬司者四年至元十七年世祖召入問曰汝何願天祥對願賜一死臨刑從容謂吏卒曰吾事畢矣南鄉拜而死衣帶中有贊云孔曰成仁孟曰取義惟其義盡是以仁至讀聖賢書所學何事而今而後庶幾無愧時

年四十七

吳名揚

江西通志字叔瞻金溪人咸淳進士歷官浙西制幹文天祥奏除兵禮二部架閣踴躍赴

義傾動

一時

陳繼周

宋史本傳字碩卿寧都人淳祐三年貢于鄉咸淳十年詔徵勤王兵文天祥方守贛州造

繼周問計繼周為言方畧甚詳差充浙江制置司主管機宜所部夜襲元兵南柵門殺傷相當質明

猶戰力竭

赴水死

張世傑

宋史本傳范陽人累功至黃州武定諸軍都統制咸淳四年提所部兵入衛加保康軍承

宣使總都督府兵遣將四出取浙西諸郡進沿江招討使改制置副使進保康軍節度使元軍迫臨安世傑請背城一戰元兵至阜亭山世傑提兵入定海石國英遣都統卞彪說之使降世傑大怒斷其舌磔之巾子山從二王入福州後崖山舟壞死

欽定四庫全書

卷一百四十六

謹按舊浙江通志名宦總部宋代九十四人重加
考訂司馬池周必大趙希言當入杭州趙士醫趙
子晝黃幹當入嘉興錢顓程叔達當入湖州宇文
昌齡趙鼎當入紹興陸九齡當入台州劉琪常挺
張奎當入衢州劉琦秦觀當入處州至王永權邦
彥並未宜浙梅堯臣彭戰王倫陳淵陸持之張鉉
馬廷鸞家鉉翁于浙未有政績李謙亨則本屬元
人誤入于宋者也其毛漸田渭南閻黃黼曹幽鄭
頴趙崇潔王埜馬光祖孫子秀常楫葉夢鼎徐道
隆皆為浙人當入人物志別採史乘文集并舊志
應存者共得
一百有二人

浙江通志卷一百四十六

欽定四庫全書

浙江通志卷一百四十七

名宦 二

總轄

元

巴延

元史本傳蒙古巴林部人至元初事世祖十一年大舉伐宋以巴延領河南等路行中書省所

屬並聽節制十二年十一月巴延分軍為二道期會於臨安諸軍水陸並進至臨安北十五里分遣董文炳呂文煥范文虎巡視城堡安諭軍民禁軍士毋入城遣文煥持黃榜諭臨安中外軍民俾安

堵如故建大將旗鼓率左右翼萬戶巡臨安城觀
潮於浙江暮還湖州市命索多撫諭軍民部分諸
將共守其城護其宮置三衙諸司兵於各翼以候
調遣其生募等軍願歸者聽分遣蕭都王世英等
招諭衢信諸州遣別將徇地浙東西承制以臨安
為兩浙大都督府復命張惠河喫罕董文炳呂大
煥等入城籍其軍民錢穀之數閱實倉庫收百官
誥命符印圖籍悉罷宋官府仍禁人不得侵壞宋
氏山陵巴延深畧善斷將二十萬衆伐宋若將一
人諸帥仰之若神明畢事還朝歸裝惟衣被而已
未嘗言功追封
淮安王謚忠武

蒙固岱

元史本傳蒙古達勒達氏至元十一年從巴
延南征招降湖州守將二人行省第其功承

制授行兩浙大都督府事二十一年拜江浙行省
平章政事托果斯約蘇傳旨中書省令悉伐江浙

省臣中書復奏帝曰朕安得此言傳者妄也如蒙
固盛之通曉政事亦可代耶俄以言者召赴闕封
其家貲遣使按驗無狀拜銀青榮祿大夫行省左
丞相還鎮江浙時浙西大飢乃弛河泊禁發倉庫
官貨抵其直貿易以賑之浙東盜起蠲田租以紓
民力奏以販鬻私鹽者皆海島民今征日本可募
為水工從之役既罷請以戰艦付海漕又言省治
在杭州其兩淮江東財賦軍實既南輸至杭復自
杭北輸京城往返勞頓不便請移省治於揚
州帝從其言命為江西丞相兼樞密院事

董文炳

元史本傳字彥明俊長子真定藁城人至元
十年拜參知政事是歲伐宋諸軍分三道而

進文炳居左由江並海趨臨安次鹽官鹽官臨安
劇縣俟救至招之再返不下將佐請屠之文炳曰
縣去臨安不百里聲勢相及臨安約降已有成言
吾輕殺一人則害大計況屠一縣耶遣人入城諭

意縣降遂會巴延於臨安城北入城罷宋官府散其諸軍封庫藏收禮樂器及諸圖籍巴延入覲留事一委文炳禁戢豪猾撫慰士女拜中書左丞時吉王昱據台州勅文炳進兵所過禁士馬無敢踐田麥曰在倉者吾既食之在野者汝人踐之新邑之民何以續命是以南人感之不忍以兵相向次台州諸將先俘州民文炳下令敢有不縱所俘者以軍法論得免者數萬口至温州令毋取子女毋掠民有後贈平章政事謚忠獻

姜衛

元史本傳國王蘇肯徹爾子也至元十一年世祖命總兵從伐宋渡江東下會丞相巴延分三

道並進相盛部署將校申明約束吏民安堵如故拜江南諸道行臺御史大夫陳便民一十五事其畧曰併行省削冗官鈐鎮戍拘官船業流官錄故官職蹟遺淮浙鹽運司直隸行省行大司農營

司併入宣慰司理訟勿分南北公田台佃仍減其租革宋公吏勿容作弊帝皆納焉浙東盜起浙西宣慰使錫里巴縱兵肆掠俘及平民乃遣御史高琬據錢塘津渡閱治之得釋者以數千計錫里巴遁還都奏執治其罪二十年拜江淮行省左丞相封馮翊郡公謚文穆

輝圖

元史本傳諤魯訥台氏至元十二年權樞密院事徇秀州撫治臨安迤東新附軍民同元帥色

埒默特穆爾張弘範徇温州所至州郡迎降授鎮國上將軍浙東宣慰使討台慶叛者戰於黃奢嶺又戰於温州白堊屯寨十六年授行省參知政事

高興

元史本傳字功起蔡州人至元十二年巴延伐宋承制授興千戶由間道奪獨松關進至武康

巴延北還留興以兵取郡縣之未下者衢婺二州已降復叛興討之七戰至破溪進戰蘭溪復取婺

州進戰衛城下連戰亦山陳家山圍江山縣獻魏
福興等七人於行省遷鎮國上將軍管軍萬戶鎮
婺州充衛婺招討使東陽王山犀盜張念九強和
尚等殺宣慰使陳祐於新昌興捕斬之遷浙東道
宣慰使奉省檄討處州及溫台海洋犀盜平之改
浙西道宣慰使拜江淮行中書省參知政事平婺
州盜施再十改浙東道宣慰使拜行尚書省參知
政事捕斬柳分司於婺州討處州盜詹老鵠溫州
盜林雄興潛由青田擣其巢穴戰葉山擒老鵠及
林雄等二百餘人大德三年改江浙行省平章政
事

張弘範

元名臣事畧字仲疇中統三年授行軍總管
至元十三年浙東叛弘範討之師次台州拔

之衆請屠城弘範不許誅其首禍者而
已台民至今感之後封淮陽王謚獻武

張惠

元史本傳字廷餘成都新繁人至元中巴延伐宋惠主饋餉宋降入城籍江南民為工匠凡三

十萬戶惠選有藝業者僅十餘萬戶餘悉奏還為民二十八年以平章政事行省杭州

孟祺

元史本傳字德卿宿州符離人至元十二年巴延伐宋授祺行省咨議諸將利剽掠爭趨臨安

巴延問計祺對曰宋人之計惟有竄閩爾若以兵迫之彼必速逃一旦盜起臨安三百年之積焚蕩

無遺矣莫若以計安之令彼不懼正如取果稍待時日耳巴延乃遣人至臨安以安慰之宋乃不復

議遷江南平陸授嘉興路總管首以興學為務創立規制擢浙東海右道提刑按察使

劉宣

元史本傳字伯宣其先潞人後徙太原宣撫張德輝薦為中書省掾至元十六年從丞相巴延

平江南贊畫居多同知浙西宣慰司事在官五年感惠並著由集賢學士除行臺御史中丞

呼都克特穆爾

元史本傳字漢卿至元十一年從丞相巴延渡江既取宋遣視宋故宮室護帑

歲諭下明越等州延祐三年大臣以浙東倭奴商舶貿易致亂奏遣漢卿宣慰閩浙撫戢兵民海陸

為之靜謐

諤勒哲圖

元史本傳欽察人至元十一年從丞相巴延南征江南平因賜名巴圖爾拜江浙行省左

丞兼管軍萬戶初浙西私鹽吏莫能禁諤勒哲圖躬詣松江上海收鹽徒五千隸軍籍授中書左丞行浙西道宣慰使成宗即位授江

高源

元史本傳字仲淵晉州人僉江南浙西道提刑按察司事劾達魯噶齊馬恕奪民田及他不

事恕懼走賂權臣阿哈瑪特以他事誣源既繫獄急釋之先是源所居鄰里多阿哈瑪特姻戚素知源事

母至孝至是聞源坐非辜悉詣阿哈瑪特曰源孝子也非但我知之天必知之況媒孽之罪非實若妄殺源悖天不祥阿哈瑪特感悟得不死尋除河間等路都轉運副使

陸垕

元史城夢解傳垕字仁重江陰人至元間丞相巴延以師南下奏授為同知徽州路總管府事以廉能擢置憲臺累遷浙西廉訪使所至以黜賊

吏洗冤獄為己任嘗上章奏免儒役及舉行浙西助役法卒謚莊簡

陳思濟

元史本傳字濟民柘城人以身器見稱至元中同知紹興路總管府事承檄獄桐廬有

囚羸瘠將死縱遣還家候期來決囚拜請曰聞公名久矣若不早決恐終不可保為閱其案而釋之轉同知兩浙都運司事胥吏侵漁民困於賦役悉蠲除之加少中大夫同知浙東道宣慰司事時浙

西大水民飢浙東倉廩殷實即轉輸以賑之全活者衆檄上中書奏允之浙東復早禱於名山雨大

澍民賴以甦累遷中議大夫封潁川郡侯謚文肅

張礎

元史本傳字可用其先渤海人徙通州平章康希憲薦於世祖潛邸從伐宋凡徵發軍旅文檄

悉出其手為江南浙西道提刑按察副使佩金符宣慰使失里貪暴掠良民為奴礎劾黜之遂安縣民負險為亂命礎與同知浙西道宣慰使劉宣領兵捕之宣即欲進兵礎曰江南新附守吏或失撫

字宜遣人招諭以全衆命遂遣人諭之逆黨果自縛請罪礎釋之遷嶺南廣西道提刑按察使封清

河郡公謚文敏

管如德

元史本傳黃州黃陂縣人至元十二年遷浙西宣慰使上時政五條一曰立額簿征二曰

息兵懷遠三曰立法用人四曰省役恤民五曰設官制祿丞相安塔哈命馳驛奏出征事世祖問曰江南之民得無有二心乎對曰往歲旱澇相仍今累歲豐稔民沐聖恩多矣敢有貳志二十四年遷江西行省參知政事

陳祐

元史本傳一名天祐字慶甫寧晉人至元十四年浙東道宣慰使時江南初附軍士俘溫台民

男女數千口祐悉奪還之未幾行省權民商酒稅祐請曰兵火之餘傷殘之民宜從寬恤遣祐檢覆慶元台州民田及還至新昌值玉山鄉盜倉卒不及備遂遇害贈江浙等處行中書省左丞追封河南郡公謚忠定父老請留墓會稽不得乃立祠祀之子夔芍陂屯田萬戶初在揚州閩祐遇盜死泣請於行省願復父讐擒其賊魁戮於紹興市

托卜嘉

元史多托爾台傳多托爾台子至元十五年為浙西按察使性淳靖喜怒不形知民疾苦

而能以善道之旱常致禱即雨歲飢請於朝發廩以賑睦同僚興學校士民刻石紀其政績

鄭溫

元史本傳真定靈壽人至元十八年江淮行省知政事杭民飢出米二十萬石糴之陞江浙

丞左

史弼

元史本傳字君佐一名塔爾彈蓋州博野人至元十年從巴延南征進定遠大將軍十九年任

浙西宣慰使二十一年春霖雨米價湧貴弼即發米十萬石平價糴之而後聞於省省不能奪益出行浙東宣慰使平處州盜元貞元年同知樞密院事陞平章政事封鄂國公

雷膺

元史本傳字彥正渾源人太宗時詔郡國設科選試膺與選世祖至元二十三年授江南浙西

道提刑按察使時蘇湖多雨傷稼百姓艱食膺請於朝發廩米二十萬石賑之江淮行省以發米太多議存三之一膺曰布宣皇澤惠養困窮行省臣職耳豈可效有司出納之吝耶行省不能奪悉給之拜集賢殿學士贈江南江北等處行中書省參知政事

魯魯斯哈美

元史實保傳實保輝和爾人子魯魯斯哈美至元二十三年授浙東宣慰使浙東盜起討

平之移

鎮廣西

伊蘇岱爾

黃潛伊蘇岱爾神道碑烏蘭哈達族氏至元二十四年拜江浙等處行中書省平章

政事江浙省治錢塘所統列郡民物殷盛最為巨鎮伊蘇岱爾威望素著莅事伊始風采一新權貴

無或敢撓其政豪強震懾田里晏然

貝降

元史本傳北庭人美髯髯儀表甚偉至元十一年從阿珠渡江先登臨陣勇冠一軍宋平以功

授江浙省理問官遷慶元路治中歲大飢狀累上不報拜降曰民飢如是而不賑之豈為民父母意耶即躬詣行省力請得發粟四萬石民賴全活元貞間兩浙鹽運使同知范某陰賊為姦數侵暴細民民有珍貨腴田奪為己有不與則羅織之蘭谿州民葉一王十四有美田宅范欲奪之不可因誣以事繫獄十年不決事聞於省省下理問所推鞠之適貝降至官寃遂得直置范於刑大德元年遷浙東廉訪副使令行禁止豪強懾伏同寅有貪穢者拜降抗章劾之於臺遂免其官後轉工部侍郎陞尚書贈江浙左丞謚貞惠

和尙

元史本傳諤尼巴雅爾台族氏至元中江南浙西道提刑按察使浙西民衆事繁在職唯務

鎮靜人服其知大體追封浚國公謚莊肅子遷勞世祖念其功臣子即以父官授之時江浙行中書

省行御史臺皆治杭遷勢上言行省專控江浙在杭為宜行臺總鎮江南不宜偏在杭且兩大府並

立勢逼則事窒情通則威褻蓋移行臺於要便之所遂移行臺於江東大德二年授建康路總管

徐琰

萬曆杭州府志字子方東平人至元三十一年拜浙西肅政廉訪使嘗作戒石銘曰天有明鑑

國有公法爾畏爾謹以中刑罰即宋太學舊址改建西湖書院琰有文學重望東南人士重之

陳元凱

趙孟頫陳元凱碑記字時舉臨晉人至元三年以才德薦元貞十一年授浙東海右道肅

政廉訪使適兩浙大飢紹興尤甚死者相枕藉元凱賑之百方活十餘萬口積官嘉議大夫

盧克治

黃潛盧克治墓誌字仲敬開州人至元十三

年從軍取淮甸有勞授漢陽府判官遷浙江
行中書省左右司都事尋遷兩浙都轉運鹽副使
東南財計莫重於鹽筭先是恒以歲賦減耗為憂
克治規措有法自常筭外得羨鹽八萬九百
引以最闢除漢陽府致仕累階亞中大夫

史真卿

柳貫史真卿墓誌真卿世居真定以功授廣
東宣慰副使改浙東在浙破山賊柳分司衆

七千括蒼路婁蒙才楊鎮龍衆五萬東陽摧俞高
等五千紹興殪詹老鷄林雄劉甲一衆數萬溫處
間功最一時成宗即位拜江浙等處行中書右丞
至則除火餘官屋之備若干繕禁官市惡鹽鷄減

江東戶課遷江西左
丞召入拜大司農

董士選

元史董文炳傳士選字舜卿文炳次子為統
軍總管從文炳入宋宮收其文書圖籍秋毫

無所取以中書左丞與平章政事徹爾往鎮浙西
聽辟舉僚屬至部察病民事悉以帝意除之民大
悅浙多湖泊廣蓄泄以藝水旱率為豪民占以種
藝水無所居積故數有水旱士選與徹爾力開復
之成宗即位累遷

江浙行省右丞

徹爾

元史本傳楊珠濟達氏大德元年拜江浙行省
平章政事江浙稅糧甲天下平江嘉興湖州三

郡當江浙什六七而其地極下水鍾為震澤震澤
之注由吳淞江入海歲久江淤塞豪民利之封土
為田由是浸淫泛濫敗諸郡禾稼朝廷命行省疏
導之發卒數萬人徹爾董其役凡閱四月畢工召
入為中書

平章政事

托克托

元史穆呼哩傳托克托穆呼哩四世孫成宗即位
拜上都留守三年拜江浙行中書省平章政事

始至飭左右毋預公家事且戒其掾屬曰僕從有私囑者慎勿聽若軍民諸事有關於利害者則言之當言不言爾之責也言而不聽我之咎也聞者悚慄時朱清張瑄以海運致位參知政事多行不法以黃金五十兩珠三囊賂托克托求蔽其罪托克托繫之有司遣使者以聞帝曰托克托我家老臣之子孫其志固宜與衆人殊賜內府黃金五十兩寵賚之有豪民白晝殺人托克托立命有司據法誅之豪猾屏息民賴以安

哈喇哈遜

元名臣事畧幹爾喀氏大德二年拜浙江行省左丞相凡七日綱舉七十餘事民風

吏習翕然為變入為中書左丞相抗之者庶伏地攀泣馬不得前武宗即位加太保錄軍國重事

田滋

元史本傳字榮甫開封人大德二年遷浙西廉訪使有縣尹張彧者被誣以賊獄成滋審之但

俯首泣而不語滋以為疑明日齋沐詣城隍司禱
曰張或坐事有寃狀願神相滋明其誣守廟道士
進曰曩有王成等五人同持誓狀到祠焚禱火未
盡而去爐中得其遺稿今歲於壁間宜其人耶視
之果然明日詣憲司詰成等不服出所得火中誓
狀示之皆驚愕伏辜或得釋十年改濟南路總管
張珪元史本傳字公端弘範子大德三年遷浙西肅
政廉訪使劾罷郡長吏以下三十餘人府史胥
徒數百徵贓巨萬計珪得監司奸利事將發之事
干行省有內不自安者欲以危法中珪賂遺近臣
妄言珪有厭勝事且沮鹽法帝遣官雜治之得行
省大小吏及鹽官欺罔狀皆伏罪召拜樞密院事
趙宏偉元史本傳字子英甘陵人後徙潁州大德五
年僉浙西道肅政廉訪使事至大二年為浙
東廉訪副使至浙東聞郡人許謙得朱熹道學之
傳延致為師於是人知向慕未幾擢江南行臺治

書侍御史封天水郡侯謚貞獻舊浙江通志浙西
早蠲民租九萬餘石吏復徵於民宏偉核實卒蠲

之全活

甚衆

吳元珪

元史本傳字君璋廣平人大德六年拜江浙
行省參知政事初朱清張瑄以財雄江南偏

以金幣連結當路而江浙省臣為尤甚唯元珪一
無所汙皇慶元年拜江浙行省左丞江淮漕臣言

江南殷富蓋由多匿腴田若再行檢覆之法當益
田畝累萬計元珪曰江南之平幾四十年戶有定
籍田有定畝一有動搖其害不細執其論固爭月
餘不能止移疾去延祐元年拜甘肅行省左丞追

封趙國公

謚忠簡

張思明

元史本傳字士瞻其先獲嘉人後徙居輝州
大德十年除江浙行中書省左右司郎中浙

大飢首贊發廩賑之遷兩浙鹽運使歲課充贏僚屬請上增數思明日贏縮不常萬一以增為額是我希一已之禁遺百世之害天歷元年為江浙行中書省左丞會陝西大飢中書撥江浙鹽運司歲課十萬錠賑之吏白周歲所入已輸京師當回咨中書思明日陝西飢民猶餉在涸輟往復踰月是索之枯魚之肆也其以下年未輸者如數與之有罪吾當坐朝廷寔之以中書左丞相召思明平生不治產不蓄財收書三萬七千餘卷尤明於律贈清河郡公謚貞敏

高昉

蘇天爵高昉神道碑字顯卿大名人至大二年為江浙行省參知政事有旨範京城新寺供佛銅器以行省督視之期迫銅不能具或欲銷省庫錢以充用昉曰歷代泉貨孰敢擅毀有頃詔發庫錢與楮幣兼行衆方服昉之識海舶歲運米數百萬石以食京師官為給道里費朝廷命昉領之分

毫悉給於民昉以海濱官吏出入風濤請優其序遷以勸來者著於令進拜江浙行省平章政事江左繁富中外徵求百至昉熟知利病務簡靜不擾以是民用寧一

鄧文原

元史本傳字善之一字匪石綿州人至元二十七年為杭州路儒學正至大三年授江浙

儒學提舉名為國子司業科舉制行文原校文江浙慮士守舊習大書朱熹貢舉私議揭於門僉江南浙西道肅政廉訪司事吳興民夜歸巡邏者執之遁去有迫及之者刺其脅仆地明旦家人得之以歸比死其兄問殺汝者何如人曰白帽青衣長身者也其兄慙於官有司問直初更者曰張福兒執之械繫三年文原錄之曰福兒身不滿六尺未見其長也刃傷右脅而福兒素用左手傷宜在左何右傷也鞠之果得真殺人者而釋福兒桐廬人戴汝惟家被盜有司得盜獄成送郡夜有焚戴氏

廬者不知汝惟所之文原曰此必有故也乃得其妻葉氏與其弟謀殺汝惟狀而於水涯樹下得屍

與漬血斧俱在焉人以爲神移江東道贈江浙行省參知政事謚文肅

高睿

元史高智耀傳睿河西人除嘉興路總管境內有宿盜白晝掠民財捕者莫敢近睿下令不旬

日生擒之一郡以寧擢江東道提刑按察使除同僉行樞密院事遷浙西道肅政廉訪使鹽官州民有連結黨與持郡邑短長目曰十七吏莫敢問睿悉按以法闔境快之拜南臺御史中丞封寧國公

謚貞簡

戴文壁

萬歷杭州府志字君章沂州琅琊人少負經濟以廉隅自砥除爲兩浙轉運判官嘗分職

巡鹽官場法飭弊釐國課足而羣戶安堵

曹伯啟

元史本傳字士開濟寧碭山人至元中歷仕為蘭谿主簿尉獲盜三十械徇諸市伯啟以

無左驗未之信俄得真盜尉以是黜累遷台州路治中御史潘昂霄廉訪使王俱交薦擢西臺侍御史延祐五年遷司農丞奉旨至江浙議鹽法罷檢校官置六倉於浙東西設運鹽官輸運有期出納有次船戶倉吏盜賣漏失者有罰歸報著為令英宗立除浙西廉訪使泰定初引年歸

敬儼

元史本傳字威卿其先河東人後徙易水皇慶元年除浙東道廉訪使有錢塘退卒詐服僧衣

稱太后旨建婺州雙溪石橋因大興工役以病民儼命有司發其奸賊杖遣之仍請奏罷其役郡大火儼令發廩以賑取憲司廢堂材木及諸路學廩之羨者建孔子廟拜江西等處行中書省參知政事

喀喇托克托

元史本傳仁宗即位拜江浙行省左丞相下車進父老問民利病咸謂杭城故有便

河通於江汴堙廢已久若疏鑿以通舟楫物價必平僚佐或難之托克托曰吾陛辭之日密旨許以便宜行事民以為便行之可也俄有旨禁勿興土功托克托曰敬天莫先勤民民蒙其利則災沴自弭土功何尤不一月而成至正初追封和寧王謚忠獻

王克敬

元史本傳字叔能大寧人累陞江浙行省左

右司都事延祐四年往四明監倭人互市先是往監者必悉兵自衛克敬惡去之撫以恩意有吳人從軍征日本陷於倭者至是從至中國訴於克敬願還鄉或恐為禍階克敬曰豈有軍士懷恩德來歸而不之納耶拜監察御史尋遷左司都事時英宗勵精圖治更前政不便者克敬言兩浙煎鹽戶牢盆之役其重者尤害民當免其他役從之

泰定初出為紹興路總管上言乞減鹽五千引運司弗從因歎曰使我為運使當令越民少蘇矣行省徹克敬抽分舶貨拗蕃者例籍其貨商人以風水為解有司不聽克敬曰某貨出某國地有遠近貨有輕重冒險出萬死舍近而趨遠棄重而取輕豈人情耶具以上聞商人德之轉而浙鹽運司使首減紹興民食鹽五千引溫州逮犯私鹽者以一婦人至怒曰豈有逮婦人千百里外與吏卒雜處汙教甚矣自是母得逮婦人著為令元統初為江浙行省參知政事大旱諸民田減租惟長寧寺田不減遂移牘中書以謂不可忽天變而毒疲民嶺海徭賊竊發朝廷調戍兵之在行省者往討之故事漢人不得與軍政克敬抗言行省任方面之寄豈可拘法坐視乃調兵往捕之視事五月請老

李守中

蘇天爵李守中墓誌字正卿延祐六年除兩浙轉運鹽司副使守中言法久則弊理宜變

通今兩浙竈民凋弊日甚當驗其恒產差為上下
竈民既為國輸課不當復役里正代償民租在官
五年熟知其弊工本親給與民官屬不敢稍有所
掊克故事集而課亦溢比終更增鹽五萬餘引以

嘉議大夫工
部尚書歸

趙知章

萬歷杭州府志字伯常睢陽人兩浙轉運司
同知以陸運困民請因歲飢浚河民得錢以

為食官得河以浮運稽姦貪兼戶之弊察私
醢濫及之究儒學提舉陳旅為撰德政碑

瞿霆發

萬歷杭州府志字聲父上海人以功授兩浙
都轉運副使海潮壞鹽場死者萬計霆發傾

力救之流亡復還鹽事以集仁宗時拜運使浙東
飢亭民死徙霆發稽戶數第其物力而均之課更
以最
聞

王都中

元史本傳字元俞福寧州人世祖時除浙東道宣慰副使金華有毆殺人者吏受賕以為

病死都中摘屬吏覆按得其情餘姚有豪民張甲居海濱為不法吏無敢涉其境都中捕繫之痛繩以法武宗除兩浙都轉運鹽使請於行省徧歷三十四場驗其物力高下以損益之役既平而課亦足公私便之擢浙東道宣慰司都元帥天歷初被省檄整點七路軍馬境內晏然轉江浙行省參知政事謚清獻

曹鑑

元史本傳字克明宛平人至治二年授江浙行省左右司員外郎明年奉旨括釋氏白雲宗田

猶檢有方不數月事集纖毫無擾天歷元年調江浙財賦府副總管屬淮浙大水民以苗告鑑損其賦什六七勢家因而詭免者鑑覈實諭令首輸陞禮部尚書追封譙郡侯謚文穆

高納麟

元史高睿傳納麟智曜孫睿之子也天歷元年除杭州路總管鋤奸去蠹吏畏民悅為江

浙行省右丞除浙西廉訪使行宣政院使上天竺者舊僧彌戒徑山耆舊僧惠洲恣縱犯法納麟皆坐以重罪請行宣政院設崇教所擬行省理問官秩四品以治僧獄訟從之尋為江浙行省平章政事十二年江淮盜起帝命為南臺御史大夫兼太尉設僚屬總制江浙江西湖廣三省軍馬十六年詔以江南行臺移置紹興以納麟為御史大夫仍太尉

韓鏞

元史本傳字伯高濟南人延祐進士天歷元年除僉浙西廉訪司事擊姦暴黜貪墨特舉烏程

縣尹干文傳治行為諸縣最所至郡縣為之肅然轉江浙財賦副總管拜中書參知政事

徹爾特穆爾

元史本傳阿魯威氏至順元年遷江浙行省平章政事以厚嚴為政部內肅然

尋召拜御史中丞

布延特穆爾

元史本傳字珍卿唐古鄂摩克氏天歷間拜江浙行省平章政事持身廉介人不

敢干以私性至孝嘗采花馬時稱為花馬兒平章云

王惟賢

蘇天爵王惟賢神道碑字國寶中山人至順三年為兩浙鹽運使經畫有方課先諸漕以

集仍補前政所負鹽十萬引時天子賜予蕃渥白金不足分命鹽漕代償惟賢設法取之而商不擾

元統初徵拜戶部尚書

策丹

元史本傳蒙古人順帝初為浙西肅政廉訪使有以駙馬為江浙行省丞相者其宦豎恃公主

勢坐杭州達魯噶齊位今有司強買民間物不從輒毆之有司來白策丹即逮之械以令衆自是丞

相府無敢為民害者尋召為同僉樞密院事在位剛介終始一節有古遺直風

王獻元

嘉靖浙江通志元統元年為浙東道宣慰副使勤慎寬厚崇尚儒雅嘗被命審囚閱實獻

詳平反全活者衆居官清白不求赫赫之名

富珠哩

神年蘇天爵富珠哩文靖神道碑字子翬元統二年拜江浙行省參知政事江浙地大事劇

而省臣煩苛事多壅積民以為病神曰職居大藩而欲吹毛求疵居下者無所措手足矣事至即決

封南陽郡

公謚文靖

梁斯

元史本傳字得之其先大食國人至元三年除僉浙西肅政廉訪司事即按問都轉運鹽使海

道都萬戶行宣政院等官贓罪浙右郡縣無敢為貪墨者復以浙右諸僧寺私蔽猾民有所謂道人

道民行童者類皆瀆常倫隱徭役使民力日耗第
勘嘉興一路為數已二千七百乃建議請勒歸本
族俾供王賦庶以少寬民力朝廷是之即著為令
改僉浙東肅政廉訪司事以病免歸瞻思歷官臺
憲所至以理冤澤物為已任平反大辟之獄先後
甚衆然未嘗故出人罪以市恩召為祕書少監不
赴追封恒山
郡侯謚文孝

伊嚕布哈

元史本傳字彥明蒙古痕都斯坦氏元統進
士授台州路錄事司達魯噶齊縣未有學

乃首建孔子廟既又延儒士為之師以教後進歷
吏部員外郎奉命至江浙糴粟二十四萬石至則
第戶產之高下以為糴之多寡不擾而事集既而
軍餉不給人奉命出糴於江浙召父老諭曰天子
宵衣旰食惟恐民不得其所夫討賊必先糴餉以
我不汝擾故命我復來益討賊即所以安民耳衆

咸應曰公言是也不踰月糧事以畢陞吏部侍郎銓選於江浙時稱其公允拜江南行御史臺中丞由海道趨紹興為政寬猛不頗除浙西肅政廉訪使會張士誠據浙西走至慶元賊改山南道廉訪使浮海北往遇倭賊船遂遇害贈遼陽等處行中書省平章政事謚忠肅

庫庫

元史本傳字子山喀喇氏幼隸國學其正心修身之要得諸許衡順帝至正時拜江浙行省平

章政事雅愛儒士甚於飢渴士大夫翁然宗之以翰林學士承旨召還謚文忠

余闕

宋源余左丞傳字廷心唐古氏父實喇藏布官合肥遂為合肥人元統進士僉浙東道廉訪司

事發奸摘伏聰察若神州縣閭闕至貪墨吏多解印綬去娶定賦無藝役小大各違度闕遣官履畝實之徭賦平衢士無養以沒入田分隸學官郡長楊珠濟達肆毒殘衢民重足立闕鞠治之獄上

御史臺臺臣與之有連反以事劾闕闕歸至正壬辰鴻和爾布哈統戎淮南起闕權淮西宣慰副使分治安慶歷陞淮南行省左丞城陷殉節贈江浙行省平章政事謚忠愍

伯勒齊爾布哈

元史本傳字大用揚珠濟達氏至順中為江浙行省參知政事江浙歲漕米由

海道達京師伯勒齊爾布哈董其事至正二年拜江浙行省左丞相行至淮東閭抗城大火疾馳赴鎮即下令錄被災者二萬三千餘戶給鈔一錠人給月米二斗幼穉給其半又請日減酒課為錢千二百五十緡織坊減原額之半軍器漆器權停一年泛稅皆停事聞朝廷從之又大作省治民居附其旁者增直買其基募民就役則厚其傭直又請歲減江浙福建鹽課十三萬引或遇淫雨亢旱出禱神祠無不應在鎮二年雖兒童女婦莫不感其恩拜中書右丞相追封冀王謚忠宣

多爾濟

元史本傳穆呼哩六世孫托克托子也至正四年遷江浙行省左丞相時杭城薦經災燬伯

勒齊爾布哈先為相庶務寬抒多爾濟咸仍其舊汀州寇竊發調遣將士招捕之威信所及數月即平杭之耆老請建生祠如前丞相故事多爾濟辭曰昔者我父平章官浙省我實生於此宜爾父老有愛於我我於爾杭人得無情乎然今天下承平我叨居相位唯知謹守法度不辱先人足矣何用虛名為台拜御史大夫

托歡徹爾

成化杭州府志字彥明賽音迪延齊氏至正二年為兩浙鹽運同知嘗言鹽者於國為大

利於民為大病急之則民怨緩之則政弛乃先具條教嚴立期約而加以寬恤民感奮盡力奉令無敢後每諭之曰吾權鹽充數足矣若求羨餘以希秩賞吾弗忍也越半年不事鞭笞而鹽皆足持已

廉潔但坐廳事退即闔門獨處不可干以私居鹽司之職而其設施若漢循吏焉

蘇天爵

元史本傳字伯修真定人至正七年拜江浙行省參知政事江浙財賦居天下十七事務

最煩劇天爵條分目別細鉅不遺復為兩浙都轉運使時鹽法弊甚天爵拯治有方所辦課為鈔八十萬錠及期而足十二年淮寇延及江東詔仍江浙行省參知政事總兵於饒信所克復者一路六縣其方畧之密節制之嚴雖老帥宿將不能過之卒於軍

呂思誠

元史本傳字仲實平定州人泰定進士僉廣西廉訪使事移浙西達實特穆爾時為南臺

御史大夫與江浙省臣有隙嗾思誠劾之思誠曰吾為天子耳目不為臺臣鷹犬也不聽已而聞行省平章左吉貪墨浙民多怨之思誠奏疏其罪流之海南官至中書左丞

董搏霄

元史本傳字孟起磁州人由國子監生歷浙東宣慰副使理冤獄革弊政至正十一年從

江浙平章赦化征安豐賊渡江至湖州德清縣而徽饒賊已臨杭州搏霄曰賊縱慾不備宜急攻之遂進兵杭城賊迎敵至鹽橋搏霄麾壯士突前斬級而諸軍夾擊之凡七戰追殺至清河坊賊奔接待寺塞其門而焚之賊皆死遂復杭州已而餘杭武康德清次第以平賊復自昱嶺關寇於潛行省假搏霄為參知政事提兵討之即進兵至呷口及虎檻遇賊大破之追殺至於潛復其縣又復昌化縣及昱嶺關賊又犯千秋關兵大至搏霄按軍不動遣人執白旗登山望賊約曰賊以我為怯必少懈伺其有間則麾所執旗又伏兵城外皆授以火礮復約曰見旗動礮即發已而旗動礮發兵乃盡出斬首數千級遂復千秋關賊復攻獨松百丈幽嶺三關搏霄又分為三軍一出獨松一出百丈一

出幽嶺然後會兵搗賊巢遂乘勢復安吉十七年
陞淮南行樞密院副使後與毛貴戰死贈河南行

省平章政事追封
魏國公謚忠定

樊執敬

元史本傳字時中郟城人至正十年授江浙
行省參知政事賊犯餘杭執敬調兵出戰掾

史蘇友龍言於執敬曰賊且至城內空虛無備奈
何執敬曰吾淬礪戈矛當殲此以報國倘或不克

有死而已何畏哉俄報賊已至執敬遽上馬帥衆
而出中塗與賊遇乃射死賊四人賊人逐之射死

三人已而賊來方盛填咽街巷且縱火衆皆潰去
賊知其無援呼執敬降執敬怒叱之曰逆賊守關

吏不謹汝得至此恨不碎汝萬段何降耶乃奮力
斫賊因中槍而墮從僕田也先馳救之亦中槍死

贈翰林學士承

旨追封魯國公

伊魯特穆爾

元史本傳巴琳沁圖魯卜台氏至正十二年江南諸郡盜賊充斥拜平章政事

行省江浙至鎮引僚屬集父老詢守備之方招募民兵數千人號令明肅統師次建德獲首賊何福斬於市遂復淳安等縣俘獲萬餘人復業者三萬餘家是年七月次徽州以疾卒於軍中

李廷佐

成化杭州府志字唐卿陝西人至正七年為兩浙都轉運使嚴明有才幹悉心鹽筴之事

凡亭民所不便者罷之欲者行之吏胥黷貨有蠹鹽法者悉屏斥之性無嗜好暇則與幕下講誦經史以為樂聲譽赫然陞戶部尚書

桑節

元史本傳字吉甫河西人至正八年為江南行臺御史大夫獨持風裁御史行部必勅屬而遣

之湖東僉事三寶珠儒者也性廉介所至搏貪猾無所貸御史有以私請者拒不納則誣以事劾之

章至星吉怒曰若人之廉孰不知之乃敢為是言耶即奏罪御史而白其誣執政者惡之移湖廣行省平章政事政江西行省平章政事討賊死之

貢師泰

元史本傳字泰甫宣城人泰定四年釋褐授從仕郎江浙行省辟為掾除紹興路總管府

推官山陰白洋港有大船飄近岸史甲取鹵海濱見其無主取其篙櫓船中有二死人有徐乙者稱為史等所劫史傭作富民高丙家史既誣服高亦就逮師泰密詢之則里中沈丁載物抵杭而回漁者張網海中因盜網中魚為漁者所殺也寬遂白游徼徐裕巡鹽遇諸豎商奪其錢撲殺之投尸於水告縣曰獲私鹽犯人畏罪赴水死驗視有傷師泰覆案得裕殺人狀餘姚孫國賓獲姚甲偽鈔受賕釋之執高乙魯丙誣以同造高嘗為姚行用魯與孫有隙師泰疑高等覆造不合以孫詰之辭屈

情見釋魯加高本罪姚死孫就法其詳讞之明為
諸郡第一至正十四年除吏部侍郎奉命和糴於
浙右得糧百萬石以給京師為平江路總管明年
授兩浙都轉運鹽使別其積蠹通其利源大課以
集國用資之復除江
浙行省參知政事

寶格

成化杭州府志輝和爾人至正九年除杭州路總
管有善政抗學卑陋大作禮殿講舍一新之十

二年蕲黃寇逼境陞江浙行省
參政引兵禦寇弗勝投西湖死

舒穆魯宜孫

元史本傳字申之其先遼之達魯特人性
警敏於書務博覽而長於詩歌至正十一

年方國珍起海上江浙行省檄宜孫守溫州閩寇
犯處州宜孫以兵平之以功陞浙東宣慰副使分
府於台州項之處之屬縣山寇並起宜孫復奉檄
往討至則築處州城為禦敵計十七年陞行樞密

院判官總制處州處為郡山谷聯絡盜賊憑據險阻輒竊發不易平治宜孫或擣以兵或誘以計未幾皆殄殲無遺類拜江浙行省參知政事明年明兵入處州宜孫曰處州吾所守死為處州鬼耳還至慶元縣為亂兵所害事聞贈集賢大學士榮祿大夫上柱國追封越國公謚忠愍

慶通

元史本傳字明德喀喇氏至正十年遷平章行省江浙托克托統大兵南征一切軍資衣甲器仗

穀粟薪藁之屬咸取具於江浙慶童規指有方陸運川輸者千里相屬出鎮海寧州州距杭百里地瀕海饒瘠民甚貧居二年盜息而民阜在江浙七年涉歷險艱勞績最著

達魯特魯善

弘治紹興府志奈曼人至正中為南臺御史大夫治紹興張士誠既稱吳王諷行臺

請實授於朝兼善不從士誠怒使奪其印兼善封印置諸庫曰頭可斷印不可得又迫之登舟曰我

可死不可辱也沐浴更衣賦詩
三章與妻子訣乃仰藥而死

周誠德

節義林續編浙江樞密院判官守平陽被
執送方明善不屈死之妻陳亦自縊於家

李希靖

嘉靖浙江通志字唐英其先蓋都人善用長
槍人以李鐵槍呼之以世勲為千戶至正十

一年授萬戶明年寇臨江浙希靖單騎直入與賊
戰於萊市斬首無算餘黨奔至昱嶺希靖追及之
適疽發於髀伏寇掩其後力疾決
戰援兵不至遂死之贈明威將軍

巴延布哈德濟

元史本傳字蒼崖輝和爾氏個儻好
學曉音律初用父廕同知信州路事

又移建德路會徽寇犯遂安將義兵平之又擒淳
安賊方清之以功陞本路總管至正十六年授衢
州路達魯噶齊明年行樞密院判官邵爾和引兵
經衢州軍無紀律所過輒大剽掠巴延布哈德濟

曰阿魯灰以官軍而為民患此國賊也可縱之乎
乃帥兵逐之出境郡賴以寧陞浙東都元帥守禦
衢州擢江東道廉訪副使十八年陳友諒寇信
州自衢引兵援焉力守孤城而死賜諡曰桓敏
謹按舊浙江通志元代名宦總部共七十九人重
加考訂梁曾趙連夏思忠鄒世閻當入杭州杜溥
劉貞當入嘉興史樞高謙當入湖州王元恭甯王
當入寧波宋文瓚穆爾古蘇當入紹興趙鳳儀王
居敬白景亮趙琬當入台州朱霽當入衢州舒穆魯
繼祖當入處州至胡祇道智受益闕復周伯琦達
實特穆爾俱無政績可考朱清已見漕運志而趙
孟頫為浙人台哈布哈亦係浙籍改入人物志別採
史乘文集合舊志所
載共得八十有二人

明

李文忠

獻徵錄字思本盱眙人太祖之甥賜姓朱明師下浙以舍人領軍破苗軍於潛昌化會

大兵取嚴州因守之張士誠遣其徒率苗軍水陸奄至文忠與戰大敗其衆帥師攻諸暨克之擢浙江等處行中書省左丞謝再興據諸暨以叛誘士誠寇東陽文忠自嚴銳師破之陞右丞士誠將李伯昇二十萬寇新城文忠即合將士未至新城十里許有地曰龍潭立營其上新城守將遣人由間道詣軍曰衆寡莫敵姑且避之文忠曰八千之謝元破八萬之符堅庸非衆乎遂下令曰彼衆而驕我少而銳以銳當驕可一戰而擒橫擄擄鞍引數十餘騎衝其中堅所向披靡敵遂大潰召還京師總水陸之師下江浙克桐廬富陽至餘杭謝再興子五人嬰城固守文忠合圍攻之一日而拔杭守將潘允明遣員外方彝詣軍前請降文忠入宿城上令曰敢有擅入民居者斬內外帖然加行省平

章政事復姓為李論功封
曹國公贈岐陽王謚武靖

胡大海

王鴻緒胡大海傳字通甫虹人太祖授右翼
統軍元帥與鄧愈朱文忠自昱嶺關攻建德

敗元援師於淳安克建德再敗楊完者降溪洞兵
三萬人進樞密院判官引兵克蘭溪從取婺州遷
無樞密院事引兵下諸暨以為諸全州移兵攻紹
興再破張士誠兵太祖以寧越重地召大海於紹
興使守之士誠將呂珍圍諸全大海救之珍解兵
去尋攻處州守將戰敗棄城走遂定處州七邑先
是軍糧少初得郡縣將士皆徵糧於民名曰寨糧
民甚病之大海以為言始命罷去以大海為江南
行省參知政事鎮金華初嚴州既下苗將蔣英劉
震李福皆自桐廬來歸大海留置麾下至是三人
作亂晨入分省署英攜鐵槌袖中陽請大海觀弩
於八詠樓下英出槌中大海腦仆地遂殺之其後

李文忠攻杭州杭人執英以降太祖命誅英刺其血以祭大海大海善用兵每自誦曰吾武人不知書惟知三事而已不殺人掠婦女不焚毀廬舍以是軍行遠近爭附之大海好士所至輒訪求豪雋劉基宋濂葉琛章溢之見聘也大海實薦之後皆為名臣追封越國公謚武壯

耿再成

吾學編五河人太祖取金華再成為前鋒屯緡雲取處州改守處州先是士卒無論大小

徵私粟民間號寨糧再成白胡大海盡罷之苗帥李佑之叛再成方與客飲聞變上馬收戰卒不滿二十人迎賊罵曰國何負汝乃反揮劍連斷數槊兵不繼賊刺再成墮馬大罵不絕口死贈高陽郡

公加贈
泗國公

常遇春

獻徵錄字伯仁懷遠人明師下浙東以同僉行樞密院事守婺城攻衢州下之累拜行中

書省參知政事大兵攻浙西為副將軍師次太湖
張士誠將尹義等逆戰遇春擒之直趨湖州之毘
山與敵兵水陸鏖戰敵兵大潰遂抵城下士信悉
發境中兵為援屯於舊館遇春統奇兵於大全港
結營東遷士信出親兵拒鬪遇春一鼓勝之士信
復遣其將徐義統赤龍船親軍來援遇春復擊敗
於烏鎮舊館義降湖州亦下遂進圍平江克之
封鄂國公拜平章軍國重事贈開平王謚忠武
鄧愈獻徵錄虹縣人太祖下浙西愈取嚴州攻淳安
縣破金子珍降其頭目三千餘人進同餘行樞
密院事領兵畧浙江臨安大敗張士誠於閑林寨
破其元帥於烏龍嶺後封衛國公贈寧河王謚武
順

湯和名山歲字鼎臣濠人拜征南將軍招方國珍定
浙東封中山侯進爵信國公高帝中年倭寇浙

東海上郡和年已六十上謂和卿尚強健為朕一行和至台用方鳴謙議設指揮衛千戶所於浙東諸郡揀丁壯三萬五千城之和自巡衛城功盡發歛州縣錢及籍犯者家物工匠往往過所望不踰年衛城成稽軍次定考格立賞令四民一軍守之吳越海上父老指烽戍歷歷稱湯信國焉

梅思祖

史槩夏邑人太祖授大都督府副使從大軍伐張士誠克昇山水寨平湖州有功遷浙江

行省右丞
封汝南侯

耿炳文

史槩濠人從太祖領軍取廣德進攻長興克之長興據太湖口陸通廣德連環宣歙為江

浙門戶太祖改為長安州立永興翼元帥府以炳文為總兵都元帥守之士誠將潘元明嚴再興帥師來爭炳文奮擊大敗去士誠復遣李伯昇率眾十萬水陸進攻城中兵七千炳文嬰城固守隨方

禦之晝夜不解甲者月餘太祖援兵集伯昇遁太祖攻永興翼元帥府為永興衛親軍指揮使司以炳文為指揮使已而士誠大發兵遣其弟士信復來爭炳文又大敗之守長興凡十年以寡禦衆大小數十戰戰無不勝士誠迄不得逞太祖伐士誠炳文率所部克湖州洪武三年封長興侯

朱亮祖

吾學編六合人以指揮使會胡深討陳友定攻桐廬餘杭至杭州降潘元明陞浙江行省

參知政事守杭州師馬步舟師討方國珍徇下仙居諸縣進兵溫州國珍子明善拒戰擊敗之方氏父子降送建康為征南副將軍洪武三年封永嘉侯

吳幹臣

獻徵錄定遠人太祖伐張士誠以指揮使從大將軍徐達率馬步舟師由港口取湖州幹

臣勒奇兵出舊館扼之戰大捷事平遂留戍焉時方國珍據明州未下以為征南副將軍從御史大

夫湯和往平之洪武元年海寇葉陳二姓聚劫蘭秀山幹臣調兵立勦之三年封靖海侯

費聚

吾學編濠人太祖下長興為永興翼副元帥守長興平吳陞永興衛指揮使討方國珍下溫台

慶元由海道進取福州
洪武三年封平涼侯

胡德濟

王鴻緒胡大海傳字世美不詳其何許人大海率以歸太祖從攻婺州為誘兵大破元師

於梅花門外擒其將季彌章太祖以德濟為樞密院同僉守信州會大海為蔣英所害而處州降將李祐之亦殺耿再成以叛張士誠聞浙東亂遣其將呂珍寇諸全德濟自信州往救之乘懈得入城與知州藥鳳院判謝再興分門守夜過半出敵不意選甲士所珍營珍士馬大驚擾相蹂躪死者無算珍遂遁去擢浙江行省參知政事移守新城士誠將李伯昇率步騎大入寇德濟閉城門戒將士

勿輕闕乞師於李文忠文忠馳抵敵營敵皆披靡城中兵乘之斬甲首數萬燔燒營落數十伯昇遁擢浙江行省右丞未幾改左丞移鎮杭州

夏穀

嘉靖浙江通志字仲穀從太祖伐婺州取之以穀為金華衛指揮領兵戍焉金華枯蒼苗兵反

殺守將胡大海耿再成等衢州或謀應之穀設方畧討賊遂定其亂穀靜中而寬外修武備慎賞罰興學勸士政令一新在鎮數十年訓練撫綏恩威兼濟兵民賴之

劉成

史檠靈壁人以統兵總管從耿炳文定長興為永興翼左副元帥數佐炳文敗士誠兵李伯昇

以十萬衆來攻城中兵僅七千寇結九寨為樓車下瞰城中運土石填濠成引數十騎出西門擊敗之擒其將宋元帥轉至東門敵悉兵圍之遂戰死贈懷遠將軍立廟長興

費子賢

嘉靖浙江通志不知何許人太祖命諸將規取湖州子賢率兵取武康克之尋破安吉命

子賢築城守焉張士誠出兵來攻為子賢所敗士誠復遣兵八萬攻安吉子賢所部僅三千人竟潰

其兵湖州遂平以功陞指揮同知時有張德者與子賢同守安吉其功亦足尚云

孫虎

史槩壽州人太祖遣從諸軍下於潛昌化安輯嚴州諸暨以功授千戶克新城取桐廬皆與有

勞陞海寧衛指揮副使嘉興盜起虎領兵捕斬之從征沙漠戰死追封樂安郡伯

徐司馬

嘉靖浙江通志字從政揚州人太祖養子授金華衛指揮同知陞杭州都指揮使為政以

惠愛為先所至撫綏士卒拯恤貧困甚得人心尤敬士大夫公暇退居一室蕭然如韋布家無餘貲

人皆賢之

王愷

史榮字用和當塗人太祖召為掾胡大海戍蘭谿命與定議取婺克衢擢左司郎中總制衢州

軍民事調度兵食有方常遇春屯兵金華郡將侵民愷械而捷諸市過春來讓對曰民者國之本將軍天子股肱肯令傷其本乎捷一部將而民安計將軍所樂聞也境內飢疫出粟賑之全活無算勸興學校士皆悅服太祖分省於婺控浙東大海治軍旅民事悉以委愷時力役無藝令民自實田數糧多者為里正寡者為副通驗其糧均賦之有一斗者役一日賤與貴皆無苟免金華猾胥滿立道操一邑田賦之柄緣為奸利康其罪狀寘於法苗軍亂害大海擁愷出愷責以大義被殺追封當塗男

李質

嘉靖浙江通志字文彬德慶人太祖命為浙江行省參知政事質以承流宣化為已任振紀綱

正風俗勸農桑興學校舉遺賢

卹民隱在任三年惠流兩浙

耿忠

嘉靖浙江通志鳳陽人洪武二年以羽林衛指揮使奉命往兩浙聽訟訪察官吏問民疾苦時

紹興三衛金華秋旱農事不登有司阻民告災忠以疏閭民皆德之

王銘

史槩字子敬和州人以管軍百戶從常遇春與吳軍戰湖州之弁山再戰舊館已又戰烏鎮凡

大小戰數十功多擢長淮衛指揮僉事移溫州銘上疏曰臣所領鎮岸大海而控島夷城池樓櫓仍陋襲簡非獨不足壯國威狎有風潮之變捍禦無所勢須改為於是繕城浚濠悉倍於舊又加築外

垣起海神山屬郭公山首尾二千餘丈宏敞壯麗屹然東浙巨鎮歷右軍都督僉事

劉承直

獻徵錄字宗弼贛縣人洪武己酉召拜浙江按察司僉事時方國珍初降承直按部懲其

尤梗法者一道肅清
按浙三年以疾歸

王濂獻徵錄字習古定遠人洪武初浙江提刑按察司僉事巡行郡縣見貪墨蠹民者必擊去之餘

則務存大體觀風宣化而已帝下詔
求直言濂歷述災傷病民竟為罷徵

安然

李因篤安然傳字資善祥符人洪武五年授浙江布政使崇禮教黜奸頑十一年海潮齧江岸

為患然親率丁夫伐石砌築
堤成民得安居陞御史大夫

單安仁

獻徵錄字德夫濠人太祖時為提刑按察司副使巡行浙東時悍帥橫斂民名曰寨糧安

仁一寘於法金華民有訟其邑丞受白金者安仁
曰頗聞丞賢爾奈何誣之即圖白金短長圖方來
上復命諸左証圖之人人殊安仁曰是非誣耶眾
環目相顧無一語遂以其罪抵訟者告訐之風為

袁陞按察使任
至兵部尚書

王鈇

嘉靖浙江通志字士魯太康人元進士洪武中為浙江布政持身廉介蒞政勤敏吏胥惴服嘗

伐石以捍江濤民免墊溺歲旱禱雨即應憂民不遑寢食民咸德之

熊鼎

史聚字伯穎臨川人太祖初平浙西授德清縣丞除中書考功博士上詔浙西民輸糧京師鼎

曰國家都金陵以浙西為根本而遽困之農作方興僕僕道路苟一年失耕害不淺矣上悅即罷之

立浙江按察司以為僉事分部台溫二郡溫有邪師曰大明教造飾殿堂甚侈民之無業者咸歸焉奏毀之散其眾為農平陽州吏目杜乙贓罪事發下鞠同知以下皆服罪獨知州梅謐廷辨不已民數百遮門外爭知州無辜鼎進民詢之數曰法以誅罪吾敢身畏譴而誅無罪人乎釋謐以情聞上

可其奏寧海強民陳德仲以憾支解黎異異妻屢訴無為白之者一日覽其牒忽有青蛙立案上曰蛙非黎異乎果異則止勿動吾復爾寃蛙如言明日逮陳訊得實誅之凡事未便者皆為奏政兩郡民灑然如更生始兩郡旱既至輒雨民曰此熊使君雨也陞山東按察副使

甘霖

江南通志字沛之高淳人洪武中以薦召入問其名曰甘霖因曰浙江大旱汝往霖之授左參

政既至夢神告曰某地有泉可濟民渴旦往儼若夢境掘之果得大泉同僚屬祈禱大雨隨至仕至江西布政

龍鐔

西江志字德剛萬載人選入南宮高帝召對嘉其能特授浙江按察使歲海飢俸贖俱蠲濟各

郡以不避權貴為忘者所中遷長洲知縣後靖難師起不屈死

趙壯 泳化類編字雲翰祥符人洪武舉人浙江右參政剽繁治劇事無滯捕海寇有功地方賴之

仕至刑部尚書

唐勝宗 史槩濠人從太祖積功進都督同知封延安侯洪武十四年浙東山寇葉丁香等作亂命

總兵討之擒賊首并其黨三千餘人

張文 嘉靖浙江通志六安人從徐達征浙西克湖州舊館諸處歷陞浙江都指揮僉事在任克修軍

政一方賴以安堵

武德 王鴻緒武德傳安豐人授千戶隸李文忠麾下從文忠取於潛昌化克嚴州進萬戶苗軍元帥

楊完者軍烏龍嶺德請曰此可襲而取也即襲完者覆其營從文忠取蘭溪克諸暨入攻紹興先登

陷陣蔣英叛金華賀仁德叛處州從文忠定金華
人從攻處州遇仁德於劉山戰敗之還師守嚴政
管軍百戶擊破吳兵於諸暨文忠遣擊江山盜撫
定之進管軍千戶移守衢予世襲最後從靖海侯
吳幹臣巡海上幹臣以德可
任令守平陽在任八年致仕

孫成

成化杭州府志徐州人少驍勇以功累官至浙
江都指揮使使浙江海濱每有島夷患成修器械

嚴守備謹烽埃海波靖息
而持守廉介莫敢干以私

王玘

嘉靖浙江通志字孟石安肅人洪武末為浙江案
察司僉事振肅風紀務詢民瘼屬司畏憚民蒙

其惠

易英

嘉靖浙江通志字以和澧州人洪武末為浙江
布政司參議政尚寬平明大體獎勵儒生務期

成效公務之暇手不釋卷

樊鎮

明一統志字君輔考城人洪武進士歷官浙江左參政賦性剛直廉幹勤敏大得時譽

王良

史槩字天性祥符人建文初為刑部左侍郎坐問燕軍較罪末減出為浙江按察使謁岳鄂王

墓誓曰苟愧步武非人也成祖即位以前事頗德之乃召良使者至良執下獄詰旦縛出期斬以徇衆劫之去良坐堂上集諸司印九悉滕置於篋攜歸入門謂妻曰我分應死顧思所以處汝未決爾妻曰君男子乃為婦人謀乎饋良食食已抱其子自投於池而死良殯殮畢積薪閉戶命妻抱幼子往某僉事家以宗祀為托遂舉火以印投之與家人同赴火死正德戊寅按察司梁材即司門內東南水鑑亭為祠祀之榜曰忠節

夏原吉

吾學編字維詰湘陰人鄉薦游太學授戶部主事建文即位陞戶部右侍郎進尚書永樂

元年吳浙大水原吉行視言浙西諸郡蘇松最居下流常湖嘉三郡土田高多下少環以太湖綿五百里納抗湖宣歙諸山水注潏山諸湖入三泖頃浦港湮塞滙流漲溢傷害苗稼拯治之法宜浚吳松諸浦港泄其壅淤以入於海并相度地勢各置石閘以時啟閉每歲水涸時修圩岸以禦暴流上從之役夫凡十餘萬原吉布衣徒步日夜經畫盛暑揮蓋去曰衆赤體暴日中吾何忍歲飢奏發粟三十萬石賑濟二年還朝復出治水水洩農田大利進少保謚忠靖

虞謙

分省人物考字伯益金壇人洪武中由國子生歷任杭州知府建文中請限僧道田人無過五

畝餘以給貧民從之永樂初巡撫浙江察廉糾貪上言數十事多見施行仁宗即位擢大理卿

劉子輔

嘉靖浙江通志廬陵人自太學生擢監察御史永樂初巡按浙江三年不見聲色善者愛

之橫者畏之時按察使周新獨持風裁不苟許與乃數數稱子輔為賢陞廣東按察使

辛彥博

嘉靖浙江通志洪武末為浙江按察使永樂中遷布政使有善政不尚苛暴得吏民之心

李素

分省人物考平谷人永樂中任浙江按察司副使發奸摘伏下無適情用刑平而怨於民不擾

仁宗召為右副都御史

周新

名山歲字志新南海人永樂中任浙江按察使初至界見羣蚘飛馬首尾之榛中得一暴屍身

餘一鎗

一小鐔識新曰布賈也收取之既至使人

大市市中布一一驗其端與識同者皆留之鞠得

盜名屍家人與布而置盜法新坐堂有旋風吹葉至異之左右言此木城中所無一寺去城差遠獨

有之新曰其寺僧殺人乎往樹下發得一婦人屍
有商人自遠夜歸將抵舍潛置金叢祠石罅中旦
取無有也商白新新曰有同行者乎曰無有語人
乎曰不謹語小人妻新立命械其妻考之得其盜
則其私也新行部徵服視屬縣觸縣官收繫獄遂
盡知其縣中疾苦明日縣人聞按察使來共訴不
得新出獄曰我是縣官大驚當是時周廉使名閻
天下錦衣指揮紀綱使千戶緝訪浙中作威受賕
會新入京遇諸丞即捕繫千戶丞獄千戶逸出訴
綱綱即誣奏新上怒逮之至抗聲陛前曰按察使
擒治奸惡陛下所命也臣奉詔書死死不憾矣上
怒命戮之臨刑大呼曰生作直臣死作直鬼是夕
太史奏文星墜上不悅問左右周新何許人對曰
南海上曰嶺外乃有此人一日上見緋衣而立者
問為誰對曰臣周新也上帝謂臣剛直使主浙江
城隍為陛下治奸貪吏言已不見新姿幹高偉好

學能文所至貧民冤繫閭之皆喜奸徒猾吏則戰魄落膽稱生閭羅云

趙本

舊浙江通志字居仁溧水人永樂中海鹽塘圯以右通政督浙西蘇松等九府水政躬行海上

指授布置併工修築堅厚完固至今賴之

羅亨信

廣東通志字用賓東莞人永樂進士授工科給事中視浙水災奏蠲嘉興海鹽崇德稅糧

五十餘萬石仕至左副都御史

周敏

咸化杭州府志字好學沔陽人永樂中任浙江按察司副使性明敏遇事立斷鞠訊獄訟洞察

情偽徒無滯獄

葉恕

江西通志字如心樂平人永樂進士拜御史適浙江溫州銀礦大發廷議頒以法官臨之遴選

起往北至規畫有條尤冰檠著聲繼按
浙江振吏治肅紀綱所至郡境晏然

嚴烜

閩書字熙叔懷安人永樂進士浙江按察司僉
事處州徐子舉亂其黨連坐者五十餘人烜訊

無辜悉散遣奉詔考察庶僚中有毀
之者遂乞教職便養得金華府教授

熊槩

湯斌熊槩傳字元節豐城人永樂進士洪熙初
以布政使巡視應天蘇松常鎮嘉湖杭八府宣

德初擢大理寺卿巡視如故海鹽民史慶真以罪
戍逃歸易名平康暴橫滋甚御史捕之遁去會赦

還益聚黨八百餘人槩捕誅之已悉捕豪惡數十
輩械至京論如法於是奸宄帖息諸衛所糧運不

繼軍乏食槩以便宜發諸府贖罪米四萬二千餘
石贍軍乃聞於朝帝允行之部御史劾槩作威福

縱兵擾民帝使人廉之無所得益任槩槩亦自信
諸當興革者皆列以聞時屢遣部官至江南造紙

市銅鐵槩言水滂民飢乞
罷之遷都察院右都御史

吳訥
泳化類編字敏德常熟人洪熙元年除監察御史巡按浙西表陸宣公里修岳鄂王墓斷秦檜

碑人仰
其風

林碩

嘉靖浙江通志字懋弘閩縣人永樂進士以御史巡按浙江宣德初為浙江按察使有中官裴

可力督事浙江湯千戶以賄結之因勢漁獵百姓驅迫郡縣碩至振舉憲法旌別善惡湯懼不容讒碩於裴裴亦懼遂誣奏碩誹謗及阻格詔旨上遣追碩至親問碩言臣住巡按浙江小人多不便臣今陞按察使小人設謀造詐欲去臣以自便臣實無誹謗語即命馳驛復任

胡軫

成化杭州府志字敬同豐城人永樂進士任浙江都轉運鹽使司運同持身廉儉一毫不妄取

於人常俸不給至驚園蔬足之請托不行商旅被
惠每出人爭趨言願為犬馬走因肩其轎行揮不
去陞浙江按察司副
使提學士人宗之

黃澤

閩書字敷仲閩人永樂進士宣德初浙江左布
政使奏罷無徵米六十萬石停止溫處二府平

陽麗水等七縣銀冶歲額銀九萬兩在
任九年劾罷不職郡縣吏五十七人

戴同吉

嘉靖浙江通志長泰人永樂進士宣德初為
浙江布政司右參議旬宣盡職上言五事一

曰明學校之教二曰嚴邊境之備三曰慎守令之
選四曰敦勸士之典五曰立勸懲之法言甚切至

帝嘉

納之

孔文英

嘉靖浙江通志字世傑安化人永樂進士宣
德初擢浙江道御史黃巖縣有健訟者搆捏

齊民三千人相聚譁張為非文英奉勅鞫問一訊即得其情立遣誅誤者獨械首訟一人治之中外服其明果

許亨

獻徵錄字士通定遠人以父廢為指揮僉事累進都指揮使鎮浙江海寇時或竊發亨擇人守

屯堡時訓練寇遂屏迹歲調兵士運漕給京師分番更代立為成規以是勞逸均而餽餉及期拜左軍都督僉事卒於官

許銘

嘉靖浙江通志南昌人永樂進士宣德初為浙江按察司副使持憲嚴明人不敢干以私興利

除害民
皆感服

嚴孟衡

西江志字衡中分宜人永樂進士浙江按察副使莅任前一夕胥吏不戒於火案牘燬孟

衡自引辜受罰運磚逾年有白其枉者赦復職時
法網稍密孟衡悉心平反一牘中至理寃濫數十

人遷四川
右布政使

陳鎰嘉靖浙江通志字有戒吳縣人永樂進士擢御
史陞浙江按察副使用法寬平臨事簡易民信

愛之宣德間陞
都御史謚僖敏

楊曷湖廣通志字文昭崇陽人永樂進士宣德四年
為浙江按察司僉事分按浙西賊據百丈山蘆

弄洞頻出金衢剽掠曷夜夢神人贈詩云影入菱
花秋月裏人如枯草夕陽邊乃識於心曰賊在吾

目中矣詰朝亟捕之圍山得賊首餘
皆解散金衢以安擢廣東按察使

馬謹獻徵錄字慎言新樂人宣德進士以御史按浙
所至克振風裁貪猾屏迹大學士楊士奇以冰

霜鐵石比之時以為確論
官至副都御史巡撫河南

周忱

世法錄字恂如吉水人永樂進士宣德五年巡撫直隸江南正統六年兼巡撫嘉湖二府時海

鹽築捍海塘一郡七縣合役萬夫費萬計皆出忱度支海不能為患浙江當造海船五十艘忱召問都匠言一艘須米千石忱以成大事不惜小費第減二十石奏於朝報可忱字量寬弘才識通敏莅事精勤臨民和易性尤機警籌畫諸郡錢穀巨萬一屈指無遺算每會計視地豐凶為緩急而張弛之調劑變通民無逋負官有餘積進工部尚書謚文襄

王翱

鐵輔通志字九臯鹽山人永樂進士正統初擢都御史巡撫浙江拊善摧奸政聲大著後位至

吏部尚書謚文肅

焦宏

湯斌焦宏傳字克明葉縣人永樂進士正統六年為戶部右侍郎時倭寇數犯內地命往浙閩

蘇松飭兵備禦宏奏緣海衛所宜畫疆分守不得互諉增設城堡成卒周歲交代勿踰時日以均勞逸嘗親歷衛所廉察軍吏得其營私廢公狀請分勅御史巡視閩浙使懲戢奸頑益嚴武備皆見施行時有言閩浙江銀場者命往勘之宏知其害民乃言礦脈消長無時開場之後恐滋奸偽卒年五

八十

張驥

史榮字仲德安化人永樂舉人正統中巡撫浙江初慶元人葉宗留與麗水陳鑑胡以盜礦為

業七年遂為亂散掠浙江江西福建境上而遂昌賊蘇牙俞伯通剽蘭谿與相應驥遣金華知府石瑁擊斬牙等撫定其餘黨而鑑胡已殺宗留驥命麗水丞丁寧率老人王世昌等齎榜入賊巢招之

鑑胡遂偕其黨六十餘人出降
驥在浙江甚有建樹民追慕之

俞士悅

湯斌俞士悅傳字仕朝長洲人永樂進士正統四年任浙江布政司參政初至佯若不解

事者羣吏易之越數日盡得其奸猾狀發摘若神吏大驚倭寇犯境修乍漱二浦城以備之遷河南

右布政使仕
至右都御史

楊瓚

史榮蠡縣人永樂進士擢浙江右布政使平陶得二之亂景泰二年以湖州諸府官田賦重請

均之民田賦輕者而嚴禁飛詭之弊詔與鎮守侍郎孫原貞督之田賦稱平

軒輓

湯斌軒輓傳字惟行鹿邑人永樂進士正統時以御史清理浙江軍政劾不職官四十餘人遷

浙江按察使妻執井鑿所著寒暑一布袍居常蔬食不過一豆間或具雞黍聞者驚異在任與周新

齊名聞親喪隔宿即行同寮追送不及服除擢副都御史巡撫浙江時土寇吳金八等攻掠城邑輒親督將士與戰平之福建賊羅丕廖寧八攻劫尤溪漸抵浙境輒授方畧捕其渠魁賊遂解散天順初為刑部尚書帝召見曰昔浙江廉使考滿家具僅一竹籠是汝耶輒頓首謝仕終左都御史

李俊

統鐵輔通志字文英定興人以明經薦擢御史正

捕俊敗之街亭橋越三日賊首來劫鎮守太監李德懼欲走俊叱止之明年賊圍處州後募敢死士八百人為子臨城射殪衣紅者一人出城奮擊破之因請降都御史張楷不受賊復驚變俊灑泣誓衆衆感奮出死力大破之躬擐甲胄十有二日事解脫胄髮盡禿仕至山西按察使

陶成

名山歲字孔恩鬱林人由舉人累官浙江按察司僉事九載考績民詣闕乞留陞本司副使正

統七年倭寇東海成預布丁令板海淖中賊艤舟躍岸盡被刺朴伏兵四合殲而焚之十三年處州賊葉宗留等為變將逼金華之蘭谿成執渠魁戮黨與數百人乃分遣招撫得降者二千餘人宗留等還遁入處及溫台山谷間成抵寨諭之留壘中七日皆感悔出降獨餘黨陶得二者不受撫遁入山谷久之復出攻武義武義故無城柵木而已得二以緼束薪使人先匿入柵中而自率眾外攻柵成與都指揮崔源驅兵出戰賊從中燒柵為內應力戰不支遂遇害贈浙江布政司參議

吳昇

分省人物考字亨晦懷寧人宣德進士擢工科給事中

正統癸亥闕浙礦徒為盜陞浙江參議

督兵往輯至則撲其黨廉其失機都指揮以下數人奏置之法眾乃股栗不二載賊屏息政績著聞

黃裳

湯斌黃裳傳字元吉曲江人正統進士授監察御史言浙江寧紹台疲宜蠲租賑恤從之巡按

兩浙見民遭水患奏請賑恤後歿於土木

朱英

名山歲字時條郴陽人正統進士授監察御史處州賊葉宗留反其黨周明松等四出標掠遣

英與中官守要地時勦寇大軍尚駐金華英至徑趨處州榜諭脇從降者甚衆以計生致明松等數人械至慶元誅於市賊平還京陞右副都御史巡撫甘肅

陳璇

魏驥陳璇傳字在璣鳳陽人登進士第為浙江按察使寬不縱猛不殘浙人懷德或謂璇少擊

搏風璇曰法貴禁人不犯不從禁而罹於法某亦何嘗少貸耶後赴闕軍民數千人填衢塞巷挽留之馬不能前璇駐於城之宗陽宮一宿黎明取問道而去

汪琰

西江志字廷用樂平人正統進士以御史按浙病湯輒發粟賑貸娶富民私隣婦而殺其女獄

無証有烏為怨聲琰廉之即烏所止處得其屍論如法擢山東副使

耿定

明一統志和州人浙江布政司參議正統末處州盜起定領兵勦捕率先督戰死於兵贈浙江

按察司

副使

王晟

明一統志字景昭鄆城人浙江按察司僉事正統時溫處盜起晟往討之戰死贈江西布政司

參議

議

李慶

歙縣錄字積善沔陽人國子監生正統時擢浙江都轉運鹽司運使兩浙鹽利為他運司甲巨

商豪賈投券者踵相蹀於庭慶嚴簿書時出納絕請謁有持券請鹽者按歲月先後給之權貴請托謝絕不顧在官二年歲課三倍

浙江通志卷一百四十七